

M012: Anegenge

0,1 DOMINE labia mea aperies .
0,2 nu gestate mir h'regot des .
0,3 Daz ich dein lob gesprechen mege .
0,4 habe meine zunge in dein' phlege .
0,5 vnt die rede von meinem munde .
0,6 wan ob ich elliv buoch chunde .
0,7 So waer mir der rede ze vil .
0,8 der ich hie beginnen wil .
0,9 Nuo belaeite meine sinne .
0,10 sam du der eselinne .
0,11 vf taete ir mvnt .
0,12 daz si ir maeister taete chunt .
0,13 Daz er nicht fvrbaz solde .
0,14 dar er doch reiten wolde .
0,15 Also phlege dv meiner zunge
0,16 mit deiner waeisunge .
0,17 wan ich von deiner gyte .
0,18 vnt von deiner diemvte .
0,19 Von der weile . vnt von den tagen .
0,20 wolde gaenzlichen sagen .
0,21 Da dv gedaecht inne .
0,22 wie dv mit deinem sinne .
0,23 Die vinster braechtest ze liechte .
0,24 vnt wie dv von nichte .
0,25 Woldest wrchen elliv dinc .
0,26 als si hivte hat der werlde vmberinc .
0,27 Uernemt den allen besten gidanc .
0,28 da von man saget od' ie gesanc .
0,29 Den got vm vns haete .
0,30 e er ie icht getaete .
0,31 Oder e ie icht wurde .
0,32 do gedacht er der burde .
0,33 Die er vm vns wolde tragen .
0,34 wir wellen groziv dinc sagen .
0,35 Vnt wunderlichiv maere .
0,36 von vnserm schephaere .
0,37 Nv such ich seine gyte .
0,38 daz er mich da vor behvte .

0,39 Daz ez mir armen icht erge .
0,40 als hie vor gebot div alte e .
0,41 Swer an dem wege icht liezze .
0,42 daz sich ein blinde dar an stiezze .
0,43 Daz in der vasten solde .
0,44 div selbe e ouch wolde .
0,45 Swer einen brunnen wolde graben .
0,46 daz er ze gelten mvse haben .
0,47 Swaz dar inne ertrunche .
0,48 alle die nu dunche .
0,49 Daz ich ce tieffe welle graben .
0,50 die wil ich gerne von dem schaden .
0,51 laeiten hin dan baz .
0,52 ich rat ouch den tumben daz .
0,53 Daz si sich des gelouben .
0,54 vnt in div gotes tovgen .
0,55 So tieffe nicht gedenchen .
0,56 daz si sich selben icht ertrenchen .
0,57 Ich wil des geltes ledic sein .
0,58 an allen den die dar in .
0,59 Ir gedanch gevellent .
0,60 die daz ervorschen wellent .
0,61 wa got vor des genas .
0,62 do der entwederz was .
0,63 Himel . noch erde . noch daz liecht .
0,64 solhe gedanc sint enwicht .
0,65 vnt die sich versenchen dar in .
0,66 wie die dri namen sein .
0,67 vnt war vmbe div gotesgvte .
0,68 der grozzen vbermvte .
0,69 Dem tievel verhancte .
0,70 da er sich selben mit versancte .
0,71 Vn- im manic sel seit an gewan .
0,72 vnt wie er dem ersten man .
0,73 valles verhancte .
0,74 an dem er wol erchante .
0,75 Daz er mit dehaeinen dingen .
0,76 in wider moechte bringen .
0,77 wan mit sein selbes bluote .
0,78 vnt war zuo der guote .
0,79 Des geburt wolde .
0,80 an dem er wesse daz er solde .
0,81 In der helle ewichlichen sein .
0,82 vnt wa mit div arm- chindelein .
0,83 Daz fiver haben gechouffet .
0,84 div da vngetovfet .
0,85 An ir schulde schaeident von hinne .
0,86 swer nach solhem sinne .

0,87 Tieffe wil gedenchen .
0,88 der mac sich selben wol ertrenchen .
0,89 Nv vernemt chvrzlichen daz .
0,90 wa got vor allen tagen was .
0,91 Vnt vor aller geschefte .
0,92 Vf seiner magenchrefte .
0,93 Er gewaltichlichen saz .
0,94 in im selben er was .
0,95 Enbor trug in sein gothaeit .
0,96 owe . wie sanfte er enbaeit .
0,97 Dirre werlde gruntveste .
0,98 ob dem abgrvnde was sein reste .
0,99 Der gotesgaeist da swebte .
0,100 wnnechlich er lebte .
0,101 Im wart seit nie wirs oder baz .
0,102 denne im ouch do was .
0,103 Ich tvon iv waerlichen chunt .
0,104 daz himel . vn- erde dehaein stunt .
0,105 Gotes nicht mocht enberen .
0,106 daz waer vns nicht ze leren .
0,107 Daz er ir ze icht bedvrfen solde .
0,108 do er sei von erste wrchen wolde .
0,109 Er schuff sei wan durch seiniv chint .
0,110 den dienten si immer mer wol sint .
0,111 Daz er werden hiez daz liecht .
0,112 daz tet er vmbe daz nicht .
0,113 Daz er ie vinster gewunne .
0,114 den man . vnt die sunne .
0,115 Die schuooff er ze div .
0,116 daz si solden dienen iv .
0,117 Sam tet er allez daz der is .
0,118 alle die des sint gewis .
0,119 Daz er ez beschuooff vmbe daz .
0,120 daz im selben waere dester baz .
0,121 Der geloube hat sere missevarn .
0,122 got muz alliv dinc biwarn .
0,123 vnt vf haben mit seiner chrefte .
0,124 moecht im icht an seiner magenchrefte .
0,125 Geschaden so het er mve dannen .
0,126 ir svlt wizzen von wannen .
0,127 dem tievel chom die hohvart .
0,128 dur die er verstozen wart .
0,129 Gotes gewalt was ie .
0,130 vnt verwandelte sich nie .
0,131 Noch nimmer getuot .
0,132 got ist genaedic vnt guot .
0,133 als groz was sein herschaft .
0,134 vnt sein gewalt . vn- sein chrafft .

0,135 e . div erde . vnt des himels liecht .
0,136 geschaffen wurden von nicht .
0,137 Sam si hivte sint in disen tagen .
0,138 do ne wolt er die wnne nicht eine tragen .
0,139 Er wart ze rat in seinem mvote .
0,140 mit sein selbes gvte .
0,141 vnt mit seiner weishaeit .
0,142 er wolde sein lob machen braeit .
0,143 vnt die wnne machen gemaeine .
0,144 die er alaeine .
0,145 Ie gedacht haete .
0,146 dv waren seine gvte raete .
0,147 Daz er die engel werden hiezze .
0,148 vnt daz er in liezze .
0,149 frei ir gemvte .
0,150 ob si mit diemvte .
0,151 Im dienten willechleiche .
0,152 daz si ze seinem reiche .
0,153 Dester bezzer recht hieten .
0,154 daz svmlich gerieten .
0,155 also gahes zu ir verlor .
0,156 daz sach er vil wol vor .
0,157 Sam tet er sein selbes tot .
0,158 vnt alle die not .
0,159 Div im da von chvmftic was .
0,160 doch gunde er im der mv baz .
0,161 Die er da von gewunne .
0,162 denne ob er sei getwunge .
0,163 Mit dehaeiner slachte sinnen .
0,164 daz si in mvsen minnen .
0,165 Wan het got die engel geschaffen alle .
0,166 daz si nicht moechten chomen sein z dem valle .
0,167 So het er wider die gitan .
0,168 die im dannoch bei wolden gistan .
0,169 Durch der verzagten siechtuom .
0,170 wold er in nicht vnrechtes tuon .
0,171 Den vesten vnt den staeten .
0,172 die seinen willen taeten .
0,173 Vil gerne ane twanchsal .
0,174 e wolde er dulden disen val .
0,175 vnt ouch sein selbes tot .
0,176 e er durch dehaeiner slachte not .
0,177 Den guten braeche ir recht .
0,178 swer hiv het einen chnecht .
0,179 Der im gerne wolde dienen .
0,180 ob er in dar vber vienge .
0,181 vnt betwunge in der zuo .
0,182 daz er ez mvse tvn .

0,183 Denne vnder seinen danc .
0,184 so het er vbel getwanc .
0,185 Den guoten willen geergerot .
0,186 an aller slachte not .
0,187 do div gotesgvte do .
0,188 an dem rate also .
0,189 Mit seiner weishaeit saz .
0,190 do geriet si im daz .
0,191 Daz er schvff elliv dinc .
0,192 als siv hat der werlde vmberinch .
0,193 Den himel . vnt die erden .
0,194 er hiez daz liecht werden .
0,195 vnt die engel dar inne .
0,196 daz was sein erste stimme .
0,197 Die got ie gesprach .
0,198 die engel schuff er daz si gemacht .
0,199 Iemer vnt wnne .
0,200 vnt mandvnge .
0,201 Mitsamt im haten .
0,202 daz het im sein gvte geraten .
0,203 Ouch schuff der haeilige christ .
0,204 allez daz hivte ist .
0,205 In fvmf tagen chvndet vns daz buoch .
0,206 an dem sehsten er den man geschuof .
0,207 vnt ouch svmlichiv tyer .
0,208 der tievel geviel do vil schier .
0,209 von dem himelreiche .
0,210 vil harte wisleiche .
0,211 Got ez allez vnderschiet .
0,212 von der vinstertaeilt er daz liecht .
0,213 Daz ist der tac . vnt div nacht .
0,214 dem wazzer gab er seine macht .
0,215 Den sternnen . vnt dem mane vn- d' sunne .
0,216 baz danne ich gesagen chvnnne .
0,217 Gab er in besunder ir ceit .
0,218 also begiengen si z immermere seit .
0,219 wie chlaeine er ez do ordenot .
0,220 des ist dehaein not .
0,221 Daz wir daz allez gesagen .
0,222 wan wir der ceit nicht en haben .
0,223 Daz wir so verre chomen dar in .
0,224 niwan daz wir mit disem begin .
0,225 Iv ermanen ein taeil .
0,226 wie sich hup vnser haeil .
0,227 vnt wie zaegeleiche .
0,228 sich von gotes reiche .
0,229 Der tivel selbe verstiez .
0,230 vnt wie er vns des engelten liez .

0,231 die engel beschuoff d' gotesgiwalt .
0,232 durch seiner gyte einvalt .
0,233 Daz si in loben solden .
0,234 des si doch nicht en wolden .
0,235 Lucifern dunchen genuc .
0,236 vntz er sich hoher hup .
0,237 Denne er von rechte solde .
0,238 seinen stul er setzen wolde .
0,239 Enneben seinem herren .
0,240 des engalt er an seinen eren .
0,241 vnt was daz vil billich .
0,242 do er nicht lie genvgen sich .
0,243 Daz er got als geleich was .
0,244 als dem insigele daz wachs .
0,245 Daz vmbe daz . dar an gedruht wirt .
0,246 daz ez im geleichze bilde birt .
0,247 Des moecht in wol genvget han .
0,248 er douchte sich so wol gitan .
0,249 Do er sich selben ane sach .
0,250 in seinem willen er do sprach .
0,251 Er wolde dem obristen sein geleich .
0,252 daz was iedoch viel tivelich .
0,253 wan er wol wesse daz .
0,254 daz got so giwaltic was .
0,255 Daz er in des wol wider braechte .
0,256 do tet er z in der andaechte .
0,257 Swie ez im ergienge .
0,258 oder swie er z angevienge .
0,259 Er wolde doch immer wider got sein .
0,260 waz solde sant Augustin .
0,261 Denne maenen da mite .
0,262 Er sprichet daz er so lange niht enbite .
0,263 Mit seinem vbermvte .
0,264 daz er der gotesgyte .
0,265 Ie . gesmachte dehaein taeil .
0,266 sein gedanc gebar im vnhaeil .
0,267 Biz da er vol geschaffen wart .
0,268 do warf in div hohvart .
0,269 In daz abgrvnde .
0,270 in . vnt alle die in der svnde .
0,271 wolden gehelen vnt bei gistan .
0,272 die mvsen vallen von dan .
0,273 In den ewigen tot .
0,274 da si angest vnt not .
0,275 vnt fivrin gebende .
0,276 habent immer an ende .
0,277 durch so getane svnde .
0,278 hat daz abgrvnde .

0,279 Der tivel besezzzen .
0,280 wir svlen nicht vergezzzen .
0,281 wir n sagen waz sei die dri genende .
0,282 nv ist ez so tieff vnt so fremde .
0,283 vnt so gar grundelos .
0,284 mich en welle der ewige trost .
0,285 Beweisen dar inne .
0,286 daz ich ez mit meinem sinne .
0,287 Nimmer mac verenden .
0,288 wil aber er mir helfe senden .
0,289 So wirt sein guot rat .
0,290 got selbe gesprochen hat .
0,291 Swer von im reden wolde .
0,292 daz er dar nach nicht denchen solde .
0,293 Er gaeb im ze munde .
0,294 daz er sprechen chunde .
0,295 So ez im choeme an die not .
0,296 sam tuo er ouch mir durch seinen tot .
0,297 Meinem gaeist geb er die lere .
0,298 vnt ouch den horeeren die ere
0,299 Daz ez in ze staten chume .
0,300 von dem vater . vn- von dem sune .
0,301 vnt von dem haeiligem gaeiste .
0,302 wil ich reden mit seiner vollaeiste .
0,303 do dannoch nicht geschaffen was .
0,304 wan daz der gotesgaeist daz .
0,305 vff des lufftes vederen .
0,306 do en was er an der namen entwedern .
0,307 Daz der vater . vnt der sun ist .
0,308 er wart ouch ze dehaeiner vrist .
0,309 An den haeiligen gaeist nies .
0,310 die dri namen het er ie .
0,311 war zuo si ouch genant sein .
0,312 vnt ein gothaeit an den drin .
0,313 Daz ist wunders so vol .
0,314 daz ez niemen mag ergrvnden wol .
0,315 Ouch ist von solher herschafft .
0,316 menschlicher vnchrafft .
0,317 ze redene vil schedlich .
0,318 nv svlt ir biten vmbe mich .
0,319 Der von anegenge also hiezzze .
0,320 daz er mir den muot entsliezzze .
0,321 Der vater ist . der gotes gewalt .
0,322 der wirt von rechte der zu gezalt .
0,323 wan er gewaltichleiche .
0,324 besezzzen hat div reiche .
0,325 Vnt allez daz der ist .
0,326 er gebar in einer churzen vrist .

0,327 Mit seiner chreffte den sun .
0,328 der haeizzet sein weistum .
0,329 wan er weislichen tun chan .
0,330 vnt ist vil gehorsam .
0,331 Seines vater willen .
0,332 an aller slachte dingen .
0,333 Der haeilige gaeist ist sein gvte .
0,334 e . er ie icht getaete .
0,335 Div het sein alles ermant .
0,336 die dri tugende waren ensamt .
0,337 An der einen gothaeit ie .
0,338 von div wart er an die namen nie .
0,339 nv vernemt z wiv daz gitan sei .
0,340 daz d' namen sein vz gimerchet drei .
0,341 vnt minner noch mere .
0,342 swie doch vnser herre .
0,343 Ander namen habe vil .
0,344 daz er vmbe dise wil .
0,345 Daz man die sunderlich ere .
0,346 sein ist dehaein durft mere .
0,347 wan dise dri genenden .
0,348 da mit sint die fremden .
0,349 Namen vnt die chunden .
0,350 bevangen ze allen stunden .
0,351 Er haeizzet herre vnt gebietaere .
0,352 er haeizzet reicher vnt vorchtigaere .
0,353 Er haeizzet vnwandeliger .
0,354 vnt starcher . vnt chrefftiger .
0,355 Ander namen hat er vil .
0,356 die ich den gleichen wil .
0,357 Die hoerent alle an den gewalt .
0,358 der ze dem vater ist gezalt .
0,359 Swa wir den vater nennen .
0,360 da svl wir die namen alle mit bechennen .
0,361 Er haeizet schephaere .
0,362 vnt got der gewaere .
0,363 Er haeizzet rechter vnt chvmftigaere .
0,364 richaere vnt fvrnvftigaere .
0,365 Haeilant vnt wunderliech .
0,366 alle namen die den sint geliech .
0,367 Die hoerent an den weistuom .
0,368 der da genant ist der sun .
0,369 Swa wir den sun nennen .
0,370 bei den svl wir dise name- bichenne- .
0,371 Er haeizzet senfter vnt guoter .
0,372 vnt diemvter .
0,373 Milter vnt erbarmiger .
0,374 gedultiger . vnt genaediger .

0,375 vnt div ware minne .
0,376 swaz wir in soelhem sinne .
0,377 Der namen mvgen besliezen .
0,378 nv svlt ir ouch wizzen .
0,379 So haeizet der haeilige gaeist .
0,380 alles gutes schvntaere vn- vollaeist .
0,381 Gotesguot haeizzet er ouch da bei .
0,382 ez ist niht durft daz er baz genennet sei .
0,383 Ir ist genuc an disen drin
0,384 ir n moecht ouch nicht minner sien .
0,385 wan so gebraest des vollen da .
0,386 ez hat ouch anderswa .
0,387 Michel bezaeichnunge .
0,388 die man mit tivscher zunge .
0,389 Nicht mag errechen .
0,390 nv wil ich iv entechen .
0,391 war vmbe man den gewalt .
0,392 an den rat habe gizalt .
0,393 vnt vmbe waz der weistuom .
0,394 sei gezalt an den sun .
0,395 vn- div gyte an den haeiligen geist .
0,396 ih wil dir z sagen du sein niht en weist .
0,397 Owe . wie rechte er sprach .
0,398 der daz von erste ane sach .
0,399 Daz der gotesgewalt .
0,400 an den vater ist gezalt .
0,401 wan er nie nicht geworchte .
0,402 durch liebe noch durch vorchte .
0,403 wan durch den sun hat er z gitan .
0,404 daz svl wir also verstan .
0,405 Der vater het elliv dinc ie .
0,406 nu gebrast ir nie .
0,407 An seinem gewalte .
0,408 er n gewunne sei wol ob er wolte .
0,409 Do chunde der weistuom .
0,410 elliv dinc wol getuon .
0,411 Het er sich ce werch gehabt .
0,412 da mit ist in nicht wid'sagt .
0,413 Er n sei dem var' ebenhere .
0,414 vnt heten ie vil geleich ere .
0,415 An ieglichem dinge .
0,416 der svn het an dem sinne .
0,417 Daz der vater het an dem gewalte .
0,418 als ich iv da vor von im zalte .
0,419 Der sun ordenot elliv dinc .
0,420 als si noch immermere sint .
0,421 e . icht geschaffen waere worden .
0,422 doch het er den orden .

0,423 vil gaerlich verlorn .
0,424 het vnz der gewalt nicht geborn .
0,425 Do tet der gewalt durch den suon .
0,426 der da ist sein weistuom .
0,427 Daz er guten machte .
0,428 nach des weistuomes achte .
0,429 Daz selbe het div gvote .
0,430 vil willechlichen in ir mvote .
0,431 wan der gewalt . noch der weistuom .
0,432 die en chunden nicht getuon .
0,433 vber ir willen noch en wolden .
0,434 noch en mochten . noch en solden .
0,435 Do en wolde div gyte .
0,436 die d' vat' . vn- d' sun heten in ir huote .
0,437 Die grozzen wnne nicht vertragen .
0,438 daz die got eine wolde haben .
0,439 Do riet si dem vater daz .
0,440 der gewaltic ze geben was .
0,441 Seit er so reich waere vnt so here .
0,442 daz er etswen mere .
0,443 Da mit solde reichen .
0,444 si bat den svn ob er willechleichen .
0,445 wol getvon chunde .
0,446 ze ieglicher stunde .
0,447 Daz er den vater baete .
0,448 daz er im sein stat taete .
0,449 Do sprach der gewalt ze dem weistum .
0,450 wie er im sein stat solde tuon .
0,451 Er sprach "da solt u haeizzen w'den .
0,452 den himel . vnt die erden .
0,453 vnt solt mit deiner chreffte .
0,454 si ervllen mit so getan' geschefte .
0,455 Der deiner hilfe mvze durft sein .
0,456 so hast v getaeilet daz guot dein .
0,457 So schol vf haben dein giwalt .
0,458 wan er dir vater ist gezalt .
0,459 Allenthalben solt v si biwarn .
0,460 nach helfe so svlen si harn .
0,461 vf ze deiner gyte .
0,462 dv solt mit diemvte .
0,463 Siv ce allen ceiten horeen .
0,464 ob wir ez wellen storeen .
0,465 Durch dehaeine ir schulde .
0,466 so sol si in die hulde .
0,467 wider gewinnen .
0,468 ez n sei daz si an soelhen dingen .
0,469 wider vns icht getvo .
0,470 daz dehaein genade hore der zvo .

0,471 So svlen si dulten deinen slac .
0,472 div vrtail wol mac .
0,473 Ergen vber die verworchten .
0,474 die got niene vorchten .”
0,475 hie mvget ir wol horeen an .
0,476 als ich da vor gesprochen han .
0,477 Daz si sein icht bedvrfen solten .
0,478 swaz si wrchen wolten .
0,479 wan daz si daz wolten .
0,480 daz wir da mit solten .
0,481 werden gereicht .
0,482 “nv ez iv beiden geleichet .”
0,483 Sprach aber der gewalt .
0,484 der dem vater ist gezalt .
0,485 “Ich haeizze ein erbe .
0,486 braeitez vnt vil bederbe .
0,487 Da wil ich selbe gewaltichleiche .
0,488 inne wonen ewichleiche .
0,489 Ich erzaeige wol als ich mac .
0,490 vntz an den ivngisten tac .
0,491 allen den gewalt mein .
0,492 ouch solte fvr baz sein .
0,493 Des gewaltic immermere .
0,494 mit vollechlicher ere .”
0,495 Mit gedanchen disiv rede ergie .
0,496 da ne wart dehaein wort nie .
0,497 vnder gesprochen .
0,498 wir haben ouch da mit niht cebrochen .
0,499 Dem gewalte sein recht .
0,500 als ir dar nach wol geseht .
0,501 Daz wir in gecigen han .
0,502 daz er vf welle geben san .
0,503 Her nach div reiche .
0,504 wan im selben vil vnschedeleiche .
0,505 Div fvrcht wirt gitan .
0,506 ez en sol niemen so verstan .
0,507 Daz er nimmer so eralte .
0,508 daz er an dem gewalte .
0,509 Dester harter icht verswache .
0,510 oder sich dester ermer mache .
0,511 Oder daz si sich immer geschaeiden .
0,512 wan daz er nimmer mer erzaeigen .
0,513 wil . so grozzen seinen gewalt .
0,514 noch seinen zorn so manicvalt .
0,515 Erzaeiget an dehaeiner stet .
0,516 als er des tages tet .
0,517 Do er elliv dinc werden hiez .
0,518 vnt do er den engel verstiez .

0,519 Durch sein hohvart .
0,520 vnt so er do gesehen wart .
0,521 Do er sande die sintfluot
0,522 vnt so er taeglichen tuot .
0,523 Mit regene . vnt mit winde .
0,524 den winter herte . den sumer linde .
0,525 vnt als er sich erzaeiget denne .
0,526 so sein gewalt daz wazzer brenne .
0,527 So er die toten ermvndert .
0,528 vnt die vbelen gesundert .
0,529 von den seinen chinden .
0,530 da sol sich vnderwinden .
0,531 Der svn der reiche .
0,532 daz er sei wisliche
0,533 Immermer besehe .
0,534 daz vns dehaein laeit geschehe .
0,535 vnt daz er die minne .
0,536 so gevestene dar inne .
0,537 Swaz ie ener getuo .
0,538 daz die andern haben minne d' zuo .
0,539 vnt sol ez also cesamne tragen .
0,540 daz der mensch . vnt die engel haben .
0,541 Niewan ein gemvte .
0,542 der salwirt div gvte .
0,543 Da ist der haeilige gaeist .
0,544 vnt wirt sein alles vollaeist .
0,545 vnder den drin genenden .
0,546 wir mvgen ez nicht volenden .
0,547 Daz wir dar vmbe wizzen .
0,548 wan also hat sich gevlizzen .
0,549 Der vater durch der gvte rat .
0,550 daz er sein chint geerbet hat .
0,551 Mit livten . vnt mit lande .
0,552 daz er den sun sande .
0,553 Daz tet er von rechte .
0,554 do er seinem chnechte .
0,555 wolde geben die widervart .
0,556 wan d' mensch durch den sun geschaffen wart .
0,557 An disen warten .
0,558 svlt ir vlaeizchlichen warten .
0,559 vnt vil wol erchennen .
0,560 swie wir den nam sunder nennen .
0,561 Ez n ist doch nicht wan ein got .
0,562 der ir einen git daz lop .
0,563 Der hat ez in allen drin gewegen .
0,564 geschaeiden wir siv niht en megen .
0,565 Swie doch div buoch iehen .
0,566 daz si besunder sein gesehen .

0,567 vnt ouch besunder v'nomen .
0,568 do der gotessun was chomen .
0,569 do man in solte tovvffen .
0,570 man sach den sun lovffen .
0,571 vnder andern svndaeren .
0,572 die ie icht da von gelaeren .
0,573 Die habent vns die veriehen .
0,574 daz der haeilige gaeist wurde gesehen .
0,575 In einer tovben bilde .
0,576 vnt ouch da wurde von himele .
0,577 Des vaters stimme vernomen .
0,578 er sprach . "her ist mein lieber sun chom- .
0,579 Den ich mir selbe erwelt han ." .
0,580 des habe niemen dehaein wan .
0,581 Daz si ie wurden geschaeiden .
0,582 entweder von den baeiden .
0,583 Doch man von der warhaeit iaehe .
0,584 daz man si horte vnt saehe .
0,585 alle dri besunder .
0,586 iedoch ist ez wunder .
0,587 Der vf der erde da gie .
0,588 vnder den svndaeren hie .
0,589 Daz ouch der von himel sprach .
0,590 vnt daz man in ob der tovvffe sach .
0,591 Sweben als ir ie habt vernomen .
0,592 in dem luffte wie daz mochte chom- .
0,593 Des welle wir iv ein taeil sagen .
0,594 wir mvgen ez nicht verdagen .
0,595 wir n bringen sein ivch inne .
0,596 doch ez menschlichem sinne .
0,597 etswa vil froemde ist .
0,598 fvr daz der haeilige christ .
0,599 Elliv dinc bedachte .
0,600 vnt si ze gesichte brachte .
0,601 Seit chom er von himel nie .
0,602 vnt was ouch vf der erde hie .
0,603 vnt in dem abgrvnde alsam .
0,604 dehaeinen ende er nie genam .
0,605 elliv dinc er bevangen hat .
0,606 do er gelaeste den rat .
0,607 Der gewalt ervlte seine bet .
0,608 den im sein gvte tet .
0,609 wan daz recht het div gvte .
0,610 swaz si gerne tuot in ir mute .
0,611 Des ist ir vollaeist der gewalt .
0,612 der dem vater ist gezalt .
0,613 Daz selbe tuot der weistuom .
0,614 also ist gehaeizzen der svn .

0,615 von div was si ie in baeiden ebenhere .
0,616 ouch het der weistum die ere .
0,617 Swaz er geordenote .
0,618 daz der gewalt vnt div gvte .
0,619 Des nicht widern salte .
0,620 do mus ouch dem gewalte .
0,621 Der weistuom sein gehorsam .
0,622 vnt div gvte alsam .
0,623 Swaz er getun mochte oder chunde .
0,624 daz si im des wol gvnde .
0,625 Si ne mocht ez minnechlichen erwenden .
0,626 nv wer mac die zal volenden .
0,627 von den drin gesant wart .
0,628 her n erde ein vart .
0,629 Daz nam vlaeisch an sich .
0,630 durch vns wart er menschlich .
0,631 vnt het an im die tugende .
0,632 der drier ginende .
0,633 Den gewalt den ez her brachte .
0,634 vnt den weistuom der iz bidachte .
0,635 vnt div gvte div ez riet .
0,636 von der ez sich nie geschiet .
0,637 Ez wart gebildet nach dem man .
0,638 den der tivel got an gewan .
0,639 daz was d' mensch den ma- sach .
0,640 div stimme div von himel sprach .
0,641 von der was daz wort chomen .
0,642 daz war vil billich v'nomen .
0,643 von dem vater her ze tal .
0,644 daz man da horte den schal .
0,645 Daz was div starche gothaeit .
0,646 div an ir selber gibar die menschaeit .
0,647 In dem vlaeische was er gar .
0,648 doch geraeichte sein gothaeit dar .
0,649 Da div stimme oben sprach .
0,650 vnt da man die tovben sach .
0,651 Die dri tugende heten ensant .
0,652 erfvllet elliv div lant .
0,653 von div moecht er vil wol reden .
0,654 vnt gen . vnt sweben .
0,655 swa so er wolte .
0,656 wan er elliv dinc erfulte .
0,657 Daz sein ie vf der erden .
0,658 dester minner icht mochte werden .
0,659 Daz der vater von himel sprach .
0,660 oder daz man den sun hie sach .
0,661 Daz nem niemen in seinen mvot .
0,662 wan der geloube waere nicht gvot .

0,663 ez waere niwan ein vrdanc .
0,664 daz sich der haeilige gaeist swanc .
0,665 Da man tovfte den gotessuon .
0,666 daz mvs er billichen tvon .
0,667 vnt was ouch vil michel recht .
0,668 wan da man seit seinen chnecht .
0,669 Sande basiliu- tovfte .
0,670 vnt in dem wazzzer bisovfte .
0,671 alda wart er ouch gisehen .
0,672 vnt ist vil diche seit geschehen .
0,673 Daz man in iemer in tovbene bilde sach .
0,674 swer icht gutes gitet oder sprach .
0,675 In des hercen mvs er sweben .
0,676 vnt en mocht doch nicht bigeben .
0,677 Den . der nie dehaein svnte .
0,678 gitet noch gefrvnte .
0,679 nv habt ir wol vernomen daz .
0,680 daz der vater nicht was .
0,681 von dem sune geschaeiden .
0,682 noch der haeilige gaeist von in baeiden .
0,683 Noch welle wir z baz biwaeren .
0,684 daz si alle dri waeren .
0,685 In geleicher staete ensant .
0,686 der vater . d' den svn hete gisant .
0,687 Der bewaerte wol daz .
0,688 daz er giwaltic . weise . vnt gut was .
0,689 Nv wie moecht er weislicher getuon .
0,690 wan daz er die weile do er den sun .
0,691 In seiner mvter bovche lac .
0,692 der werlt . als von erste phlac .
0,693 Der da ginant ist der weistuom .
0,694 wie moecht er anders gvtlich' getuon
0,695 Denne daz er die maeintaeten niht verchos .
0,696 vnt si als drate nicht verlos .
0,697 Do si den sun viengen .
0,698 vn- daz mort an im begiengen .
0,699 vnt er vil baermchleiche .
0,700 vf ze dem himelreiche .
0,701 Nach hilfe rief lovte harte .
0,702 daz er ez do sparte .
0,703 vnt ez als drate nicht en rach .
0,704 noch ez vngerne sach .
0,705 Da habet in div gvte .
0,706 div da was in dem rate .
0,707 Daz er in her frvnte .
0,708 daz er durch vnser svnte .
0,709 Gemartert mvse werden .
0,710 do der himel . zv der erden .

0,711 von des sunes tode erwagte .
0,712 daz er ez do gehabte .
0,713 Daz ez allez nicht zebrast .
0,714 vn- daz div sunne nicht gar erlasch .
0,715 Div sich verwandelt hete .
0,716 da halt der weistuom vn- div gyte .
0,717 Den gewalt biwarn .
0,718 ez waere anders allez sant zevarn .
0,719 Div gyte truch im den zorn .
0,720 d' weistu- half daz ez nicht wart v'lorn .
0,721 Der gewalt ez vaste habte .
0,722 daz im div bewegde nicht schadete .
0,723 Vil diche erzaegte der svn .
0,724 daz er den giwalt . vnt den weistuom .
0,725 vnt dar zu die gyte .
0,726 vil vollechlichen hete .
0,727 wan vns von im geschriben ist .
0,728 aller der buche list .
0,729 Den er vf der erde vant .
0,730 er vberzivhet in allensant .
0,731 Den gedanchen er widersprach .
0,732 in elliv herce er wol sach .
0,733 Daz was ein michel weistuom .
0,734 do er da wider nicht wolde tvon .
0,735 Daz man in stiez . vnt sluc .
0,736 vnt manic scheltwort v'truc .
0,737 Do erzaegte er michel gyte .
0,738 wan er ez wol gewidert hete .
0,739 er machte girecht die chrumben .
0,740 vnt weiste die tumben .
0,741 Den blinden er ir liecht gab .
0,742 do er siben tovsent sat .
0,743 vnt vierzic tage was vngaz .
0,744 do erzaegte er wol daz .
0,745 Daz er den giwalt vnt die gyte .
0,746 vnt den weistuom hete .
0,747 Er was ez eine allezsant .
0,748 des vns chvrzlichen ermant .
0,749 Der vns disiv wort vorsprach .
0,750 den haeiligen gaeist den man da sach .
0,751 In dem luffte oben sweben .
0,752 z ware hete den bigeben .
0,753 der gewalt vnt der weistuom .
0,754 daz ist der vater . vnt d' svon .
0,755 So ne moecht er noch en chunde .
0,756 sich ze der stunde .
0,757 Han gebildet ze einem voge .
0,758 noch mit im sein gewesene da obene .

0,759 Er was ez allez der da gie .
0,760 er het ez dort . vnt hie .
0,761 Enbedenthalben so bidacht .
0,762 den er da her hete bracht .
0,763 Daz den icht geriwe sein chunft .
0,764 vntz er ouch die sigenunft .
0,765 An dem tivel genam .
0,766 noch daz der vater nie giwan .
0,767 Dehaein trvbe vmbe daz .
0,768 daz des sunes armuot so groz was .
0,769 also bedacht ez der haeilige gaeist .
0,770 der sein alles was vollaeist .
0,771 vnt schvntaere .
0,772 daz an aller slachte swaere .
0,773 Ez beleiben solde .
0,774 vnt daz er sich da wolde .
0,775 lazzen . horeen . vnt sehen .
0,776 der warhaeit svl wir hie iehen .
0,777 z war . er tet ez vmbe daz .
0,778 daz wir gelovbten deste baz .
0,779 An die toffe . vnt an den gotessuon .
0,780 wie moecht er gvtlicher getuon .
0,781 Er wolt ouch dem touffaere .
0,782 erzaeigen daz er waere .
0,783 Daz ware gotes lamp .
0,784 da mit seit ir des ermant .
0,785 Daz ir drier dehaeiner .
0,786 von dem anderm nie wart geschaeiden .
0,787 der nv waere .
0,788 ein boser irraere .
0,789 Der fraget vns vbellichen des .
0,790 do er div helfe selbe was .
0,791 z wiv er daz taete .
0,792 daz er so tiwer an dem chrivce baete .
0,793 vnt du er zu der marter gie .
0,794 daz er so harte vorchte die .
0,795 Daz er driv gebet .
0,796 vf ze seinem vater tet .
0,797 Ob er si mochte vervarn .
0,798 doch er sich selbe biwarn .
0,799 Chvnde vor sere .
0,800 wen er do helfe baete mere .
0,801 Het im div marter nicht we gitan .
0,802 daz gaeb etwem den wan .
0,803 Daz er nicht mensch waere .
0,804 dem vlaeisch was vil swaere .
0,805 Swaz er im wider mvte erbot .
0,806 im tet vil wer der tot .

0,807 Do rief ez zu der gothaeit .
0,808 der nie gebar dehaein laeit .
0,809 Daz si ez nicht en lieze .
0,810 daz was ouch recht daz ez den vat' hieze .
0,811 Der ez an im selben da gibar .
0,812 vnt im chlagte daz im ane schulde war .
0,813 Noch moecht wir vil rede da von phlegen .
0,814 wan daz wir z ergrvnden nicht en megen .
0,815 von div lazze wir ez enceit
0,816 wan der herre salomon quit .
0,817 ez gebaer im leicht michel laeit
0,818 swer ce vil von der gothaeit .
0,819 Sich wil an zuchen .
0,820 vnt daz ez in leichte mvge verdruchen .
0,821 Der ez gar ervorschen welle .
0,822 het ich durchvaren den himel . vn- die helle .
0,823 vnt daz paradeise .
0,824 vnt waer ouch also weise .
0,825 als der herre salomon was .
0,826 vnt chunde swaz man ie gelas .
0,827 So en moecht ich mit dem liste .
0,828 iv daz minniste .
0,829 wort nicht errechen wol .
0,830 wan ez ist wund's so vol .
0,831 von div svl wir mit mazzen .
0,832 die rede enceit lazzen .
0,833 Swer nv ist armes sinnes .
0,834 daz er sich des dinges .
0,835 Berichten niene chvnne .
0,836 der sehe an die sunne .
0,837 Der got daz gegeben hat .
0,838 daz ma- sei i- manigem ende verstat .
0,839 Si wirt weizze gesehen .
0,840 vn- muz man ir doch hitze iehen .
0,841 Ir ist ouch daz recht gesetzet .
0,842 daz si trvchent . vnt netzet .
0,843 Swercet . vnt weizzet .
0,844 vnt doch ein schein gleizzet .
0,845 Daz tuch blaeichet si daz ez weiz wirt .
0,846 dem leibe si doch swerce birt .
0,847 Si derret die erde . vnt daz holz .
0,848 si zelaet daz wachs . vnt daz smalz .
0,849 Der disen gewalt der sunnen .
0,850 von erste wolde gunnen .
0,851 Daz si stet an dem himele .
0,852 vnt wrchet hie nidene .
0,853 Div werch elliv besunder .
0,854 so gitaner wunder .

0,855 Hat er geschaffen also vil .
0,856 der siv elliv sant wil .
0,857 Ergrvnden . vnt ercellen .
0,858 in behvte got er mvz vallen .
0,859 wand er z ein wunderlich got ist .
0,860 wie den haeiligen christ .
0,861 Dar zuo traecip sein barmchaeit .
0,862 ze vertilgen vnseriv laeit .
0,863 von himel zu der erden .
0,864 vmbe die er gervchte mensch w'den .
0,865 vnt vmbe wie gitane schulde .
0,866 wir verluren gotes hulde .
0,867 vn- vmbe waz er daz tvon wolde .
0,868 daz er den tot gerne dolde .
0,869 Daz er vns da mit nerte .
0,870 denne daz er werthe .
0,871 Adamen seinen val .
0,872 vn- vmbe waz er geschuff den . d' da sol .
0,873 In der helle ewichlichen sein .
0,874 vnt wie div armen kindelein .
0,875 Daz fiver haben gechoufet .
0,876 die da vngetovffet .
0,877 Schaeident von hinnen .
0,878 des svl wir nu beginnen .
0,879 Got het im selben gitan vnrecht .
0,880 het er so geschaffen seinen chnecht .
0,881 Daz er nicht moechte sein gevallen .
0,882 wider den engelen allen .
0,883 Het er verre gitan .
0,884 wir mvgen ouch dar an v'stan .
0,885 Daz ez giwesen waere .
0,886 wider den obristen chore .
0,887 Den wir da svlen bowen .
0,888 verdiene wir in mit triwen .
0,889 Nv vernemt waz div werch sein .
0,890 daz div armen chindelein .
0,891 Die not habent erarnet .
0,892 daz sich got vber siv nicht erbarmet .
0,893 Si heten mit ir missetaeten .
0,894 ob si z gelebt heten .
0,895 Gechouffet doch die hellen .
0,896 vnt daz div buoch daz wellen .
0,897 Ez sei vm siv also gitan .
0,898 si waeren lucifern bi gistan .
0,899 Ob er si s hete gebeten .
0,900 daz buoch sprichet an genuc steten .
0,901 Daz ein islich mensch lebe .
0,902 vntz nicht bezzers an im w'den mege .

0,903 Do got ir chvnftigen val gisach .
0,904 het er do gesehen daz .
0,905 Daz si heten giraten .
0,906 sam die zwelfpoten taten .
0,907 Er n het siv so nicht geletzet .
0,908 si heten sich gesetzet .
0,909 wider die goteshulde .
0,910 von ir vordern schulde .
0,911 Chom ez ein taeil .
0,912 die verwrchent in ir haeil .
0,913 vil manigen enden hie .
0,914 si vnt alle die .
0,915 Die mit dehaeiner gaernde .
0,916 v'wrchent gotes erbaermde .
0,917 Die geschuoff er alle vmbe daz .
0,918 daz ez ein volliv zal was .
0,919 von der gothaeit was daz vor bisehen .
0,920 swaz vns solde geschehen .
0,921 Oder swie wir giraten wolden .
0,922 daz wir daz dulten solden .
0,923 Daz was michel grozer recht .
0,924 denne daz div gvte vorbesicht .
0,925 Da gelvkket waere .
0,926 der gewalt het ouch die ere .
0,927 wolt er z gitan haben .
0,928 daz er allen vnsern schaden
0,929 wol hete erwendet .
0,930 so het er geschendet .
0,931 Des weistumes vorbesicht .
0,932 vnt het im selbe getan vnrecht .
0,933 do d' weistuom . vnt d' giwalt .
0,934 vnt div gvte waren ebenalt
0,935 wes liezen siv daz vor bisehen
0,936 Daz vns solde geschehen
0,937 So groezlichiv ere .
0,938 si en waeren nicht gewesen so here
0,939 Div haeilige weishaeit
0,940 het si elliv vnseriv laeit
0,941 Des ersten vnder varn .
0,942 der weistuom mvz ez allez biwarn
0,943 vnt richten immermere
0,944 so hat der gewalt die ere
0,945 Daz himel . vnt erde .
0,946 telr . vnt berge .
0,947 wac . vnt winde .
0,948 vnt daz abgrvnde .
0,949 Muz im sein gehorsam .
0,950 im en mac nicht widerstan .

0,951 Im muz dienen der luft .
0,952 so hat ez allez gedingen vn- flucht .
0,953 zuo der gotesgvten .
0,954 ob si ze dem ersten heten .
0,955 vns biwart also verren .
0,956 daz vns moechte giwerren .
0,957 Nimmer nicht mere .
0,958 so en heten si nicht die ere .
0,959 Die der vater . vnt der sun hat .
0,960 het wir ir helfe rat .
0,961 waz bedorft wir ir denne .
0,962 ein taeil ich dar an erchenne .
0,963 Daz ez wider den giwalt waere .
0,964 het vnser schephaere .
0,965 So geschaffen menschlich gislaechte .
0,966 daz ez gevallen niene maechte .
0,967 Noch daz im nicht mochte geschaden .
0,968 so moecht er ouch giwaltes niht habe- .
0,969 Mit vns ze tuon swaz er wolde .
0,970 von recht ez wesen solde .
0,971 allez daz nv ist .
0,972 vns hat der haeilige christ .
0,973 Da mit ze frietume bracht .
0,974 vnt hat doch sein recht bidacht .
0,975 daz ez gewesen waere .
0,976 wider den obristen chore .
0,977 vnt wider den engeln allen .
0,978 ob nicht mochte sein gevallen .
0,979 vnser vater adam .
0,980 daz wirt vns hie vf gitan .
0,981 Do die engel got verliezen .
0,982 vnt sich selben verstiezen .
0,983 Der micheln eren .
0,984 da si zu geschaffen waren .
0,985 Do stunde der zehende chore laere .
0,986 vnserm schephaere .
0,987 Daz erbarmote .
0,988 vnt die gotesgvte .
0,989 Div in seit von himel treip .
0,990 so mant in des sein weishaeit .
0,991 Er het vil wol vor bisehen .
0,992 daz den engeln geschehen .
0,993 Svmlichen waere .
0,994 in bat sein gvote daz er icht laere .
0,995 Den chor lieze durch ir missetat .
0,996 in gab sein weishaeit den rat .
0,997 Div allez dinc richten sol .
0,998 ob er der engel val .

0,999 wol wolde ersetzen .
0,1000 er solt im selbe einen sun shephen .
0,1001 vrien seines muotes .
0,1002 der des selben guotes .
0,1003 Mit dienst vf der erden .
0,1004 wirdic solde werden .
0,1005 e . er den stul bisaezze .
0,1006 ob er gotes vergaezze .
0,1007 ze dem tivel gevienge .
0,1008 daz . daz so ringe ergienge .
0,1009 Daz der chore laere .
0,1010 bestvnde nimmer mere .
0,1011 Durch dehaeiner slacht dinc .
0,1012 swenne ez elliv seiniv chint .
0,1013 Hie vil wol biwarte .
0,1014 daz er siv denne furte .
0,1015 an der engel stat .
0,1016 sein gyte in des bat .
0,1017 Daz er in daz paradeise .
0,1018 gaebe ze einem hovse .
0,1019 vnt lieze in dar inne .
0,1020 daz dienst so ringe .
0,1021 Daz er so sanfte taete .
0,1022 nichtes er in baete .
0,1023 wan daz er waere gehorsam .
0,1024 hete got des nicht gitan .
0,1025 So het er den obristen choree .
0,1026 geminneret sein ere .
0,1027 Div dem nidristem was gitan .
0,1028 ob er geschaffen wolde han .
0,1029 Menschlich geslaechte .
0,1030 daz ez gevallen niene maechte .
0,1031 Er het in seines schaden wol ergetzet .
0,1032 wan er was besetzt .
0,1033 Mit frien bowaeren .
0,1034 e . er gestvnde laere .
0,1035 wie moecht wir daz gearnet haben .
0,1036 daz wir so hoh waeren chomen .
0,1037 Daz der zehende chore .
0,1038 der obriste waere .
0,1039 vns ce haeimvte gegeben .
0,1040 daz wir da solden immer leben .
0,1041 Den engeln geleiche .
0,1042 die da vil vrileiche .
0,1043 Heten ir selber chvr .
0,1044 vnt in da nicht saltten fvr .
0,1045 Si en wolden gotes willen tuon .
0,1046 vmb daz gab er vns den frituom .

0,1047 Ob wir sam taeten .
0,1048 daz wir geleichez recht haeten .
0,1049 ze seinem reiche .
0,1050 er het ouch waerleiche .
0,1051 wider die engel gitan .
0,1052 die in danches wolden bistan .
0,1053 Nv hat er s alle biwart .
0,1054 daz ir mit ir vollaeist vart .
0,1055 In den obristen chor .
0,1056 daz sant peter dar in fvr .
0,1057 Daz en doucht sant michhel niht vmbillich .
0,1058 wan ir zwaeier arbaeit waren vngeliech .
0,1059 do der genaedige got .
0,1060 also bidachte sein lop
0,1061 vmb vnser ewigez haeil .
0,1062 vnt do der engel ein taeil .
0,1063 Geviel von seinem reiche .
0,1064 do volget er gvtleiche .
0,1065 Dem rate seiner weishaeit .
0,1066 nicht lenger er enbaeit .
0,1067 als er den chor leren sach .
0,1068 willechlichen er do sprach .
0,1069 “Einen menschen svl wir schepphen .
0,1070 den val da mit ersetzet .
0,1071 Den die engel hant gitan .
0,1072 daz si die selben wnne han .”
0,1073 Do geschuff got von himele .
0,1074 nach sein selbes bilde .
0,1075 vnsern vater adamen .
0,1076 ze michelen genaden .
0,1077 vnt ze michelem haeile .
0,1078 vz einem bloedem laeime .
0,1079 Er blis im seinen gaeist in .
0,1080 daz er ewic solde sein .
0,1081 Die fvmf sinne er im gab .
0,1082 dehaeines dienstes er in bat .
0,1083 wan daz er gerne taete .
0,1084 er gab im haeimvte .
0,1085 In dem paradeise .
0,1086 daz er ce iglicher weise .
0,1087 Mit den engeln loben solte .
0,1088 daz er in da vor wolte .
0,1089 Alreste schepphen .
0,1090 vnt denne dr in setzen .
0,1091 Daz en tet er nicht ane sache .
0,1092 swie laeit man vns ez mache .
0,1093 Er het ez vil tieffe bidacht .
0,1094 ez het vns alle in not bracht .

0,1095 Hete got der weise .
0,1096 in dem paradeise .
0,1097 Der geweichten erde genomen .
0,1098 der mensch waer vz im selben chomen .
0,1099 Swaz er guotes an im funden hete .
0,1100 daz er der gotesgvte .
0,1101 Dehaeinen danc hete gesagt .
0,1102 von seiner frvmchaeit het er z gehabt .
0,1103 Des waer wir doch verlorn .
0,1104 het adam daz obez gar verborn .
0,1105 Do der chvnic seinen sun .
0,1106 gewaltic wolde tvn .
0,1107 alles des vf der erde ist .
0,1108 do zaeigt im z der haeilige christ .
0,1109 vnt sprach “ditz si der adam .
0,1110 allez samt vndertan .
0,1111 Niwan einen bovm mein .
0,1112 der sol dir verboten sein .
0,1113 Dar an izzest dv den tot .”
0,1114 daz er vns daz obez verboet .
0,1115 Daz behielt vns allez daz guot .
0,1116 daz er vns immer getuot .
0,1117 z wiv tet er daz gebot .
0,1118 der vil genaedige got .
0,1119 Do er daz wol vorsach .
0,1120 daz adam cebrach .
0,1121 vnt sich dar an v’worchte .
0,1122 er n tet ez vmbe daz nicht daz er sein bedorfte .
0,1123 Oder daz er z ce icht wolte .
0,1124 der mensch der solte .
0,1125 Mit dem wenigem gibot .
0,1126 sich so haben gleichet got .
0,1127 Daz er dar nach waere .
0,1128 gefvret vber die niwn choree .
0,1129 die der frien engel vol sint .
0,1130 er tet ez ouch durch ein ander dinc .
0,1131 Daz vns micheler nvtzer was .
0,1132 wan ez wol wesse daz .
0,1133 Daz im der herre adam .
0,1134 nimmer so gehorsam .
0,1135 wurde an dehaeinem gibot .
0,1136 do daz vnser herregot .
0,1137 vil wol besach .
0,1138 daz des dehaein rat was .
0,1139 Der mensch der enviele .
0,1140 do riet im div liebe .
0,1141 Die er ze vns hete .
0,1142 daz er dem tievel stat tete .

0,1143 Daz er menschlich geslaechte .
0,1144 wol gevellen maechte .
0,1145 Ob wir in widersten wolten .
0,1146 daz wir haben solten .
0,1147 ze varn dester bezzet recht .
0,1148 vber die engel die nicht an vecht .
0,1149 wan ir eigen hohvart .
0,1150 div in ouch ce laeide wart .
0,1151 vnt ob vns der tievel betruge .
0,1152 zv dem valle mit seiner luge .
0,1153 Der vns doch da chvmtic was .
0,1154 daz wir moechten dester baz .
0,1155 Gewinnen die widervart .
0,1156 allen weis hat er vns biwart .
0,1157 waer adam gevallen .
0,1158 durch seinen muotwillen .
0,1159 Ane schvntunge .
0,1160 vnser dehaeiner der gewunne .
0,1161 Nimmer gotes hulde .
0,1162 daz der engel schulde .
0,1163 Ane schvntunge ergie .
0,1164 des verwarf er alcegoten die .
0,1165 Immer ewichleiche .
0,1166 von seinem himelreiche .
0,1167 An aller der gescheffe .
0,1168 die got geschuff mit seiner chrefte .
0,1169 Durch menschengeslaechte .
0,1170 dar vnder er n maechte .
0,1171 Nicht vinden so gitanes .
0,1172 daz dem herren adames .
0,1173 Iender waere geleich .
0,1174 ez n waer im vngevellechiech .
0,1175 Do sant er in den slaf an .
0,1176 ein rippe er von im nam .
0,1177 Dar vz schuoff er ein wi\ep .
0,1178 div zwaei solden wesen ein li\ep .
0,1179 Do adam erwachte .
0,1180 do saz er vnt lachte .
0,1181 froelichen er do sprach .
0,1182 als er daz wip ane sach .
0,1183 “wol dir herre du bist guot .
0,1184 daz ist mein vlaisch vnt mein bluot .
0,1185 vt mein gebaene .
0,1186 vngerne was ich aeine .”
0,1187 Do hiez er even daz wip .
0,1188 div vns allen doch siet .
0,1189 Half ze grozer not .
0,1190 durch des tievels rat .

0,1191 disiv rede ist wunderliech .
0,1192 s ist iedoch der warhaeit geliech
0,1193 Iedoch hat einer der von geschriben .
0,1194 er n werde widergetriben .
0,1195 von etwem seiner worte .
0,1196 daz vns betrvbet harte .
0,1197 wes gihet er dar vmbe .
0,1198 er chivt daz si got in einer stunde .
0,1199 Beschuooff bediv ensampt .
0,1200 daz ir nwederz chom in sein hant .
0,1201 vnt er hiez fvr bediv adam .
0,1202 daz git dirre rede einen michel archwan .
0,1203 Die wir da vor haben gesagt .
0,1204 swer den streit habe behabet .
0,1205 So volge wir dem buchstabe .
0,1206 der ez sv̄s her bracht habe .
0,1207 Der da wil daz adam .
0,1208 do got daz wip von im nam .
0,1209 So weise waere .
0,1210 daz er ir den namen gaebe .
0,1211 vnt aller der geschefte .
0,1212 die got mit seiner chrefte .
0,1213 Im hete gemachet vndertan .
0,1214 vil dieche ich vernomen han .
0,1215 von wol gelerten phaffen .
0,1216 er hab den man zwier gischaffen .
0,1217 vnt daz wip dri stunt .
0,1218 so tet mir mein maeister chvnt .
0,1219 Daz svlt ir also verstan .
0,1220 e der herre adam .
0,1221 Ie gebildet wurde .
0,1222 do geschuff got ein erde .
0,1223 vnt vns der erde den man .
0,1224 zwaei geschefte waren do gitan .
0,1225 Do was daz div drite .
0,1226 daz er dem manne nam ein rippe .
0,1227 Dar vz macht er ein wi\ep .
0,1228 fvr war vns daz buoch seit .
0,1229 Si haeizze virago .
0,1230 nv horet wie si gevielen do .
0,1231 den tivel mvot der neit .
0,1232 daz der man . vnt daz weip .
0,1233 Den stuol besitzen solte .
0,1234 dannen in sein vbermuot valte .
0,1235 Do er daz wolde wenden .
0,1236 er trovte den man nicht geschenden .
0,1237 Durch daz er nach got gepildet was
0,1238 vil wol sach er an im daz .

0,1239 Durch daz bestunt er daz wiep .
0,1240 daz die got het seit .
0,1241 Geschaffen nach dem manne .
0,1242 alzogis von danne .
0,1243 was er ir broede gewis .
0,1244 vnt versach ouch sich des .
0,1245 Daz er sei dester leichte verriete .
0,1246 daz si nicht v'nomen hete .
0,1247 Daz im got daz obez verbot .
0,1248 vnt im da von gehiez den tot .
0,1249 Nu sten ich an einem dinge .
0,1250 daz ich en waeiz wie ich fvr bringe .
0,1251 Einen streit ze einer warhaeit .
0,1252 svmlichen phaffen ist daz laeit .
0,1253 Der daz sagt fvr ware .
0,1254 daz der tievel waere .
0,1255 In dem paradeise .
0,1256 die nv sein so buochweise .
0,1257 Die widerreden ez ob si megen .
0,1258 ich horte meinen maeister reden .
0,1259 Daz er in eines slangen weise .
0,1260 choem in daz paradeise .
0,1261 zu dem weibe gegangen .
0,1262 der tivel vz dem slangen .
0,1263 Sprach z wiv si daz liezze .
0,1264 daz si nicht en aezze .
0,1265 Daz obez daz ir verboten was .
0,1266 do sagte si im daz .
0,1267 Daz ez ir verboten waere .
0,1268 von ir schephaere .
0,1269 wie sol disiv rede zesamne chomen .
0,1270 daz ir von vns habt vernomen .
0,1271 Daz si da nicht waere .
0,1272 da vnser schephaere .
0,1273 Im daz obez verboet .
0,1274 vnt daz si sich selbe an not .
0,1275 Hat doch so vaste an gezogen .
0,1276 er waene ich gar habe gelogen .
0,1277 wir wellen daz nicht fvr luge haben .
0,1278 war zu solde wir z iv danne sagen .
0,1279 So waer ez bezzer verdagt .
0,1280 ir moecht ez der man haben gesagt .
0,1281 vnt gewuc aber er ir sein nie zuo .
0,1282 so was ez ir wol verboten dvo .
0,1283 Do daz got wolte .
0,1284 daz man . vn- wip . ein leip wesen solte .
0,1285 der vbel tivel was so charc .
0,1286 d' sich da in dem slangen barc .

0,1287 vntz er daz wip betorte .
0,1288 daz er wol horte .
0,1289 An dem ir gichoese .
0,1290 daz ir herce was boese .
0,1291 Do sprach der tivel vz der slange .
0,1292 “dir vnt deinem manne .
0,1293 wil ich sagen den list .
0,1294 vmbe waz iv daz obez verboten ist .
0,1295 Er verbot ez dir vmbe daz .
0,1296 daz im wol chunt was .
0,1297 Swie schier dv sein enbeizzest .
0,1298 daz dv als drat wizzest .
0,1299 Bediv vbel vnt guot .”
0,1300 des weibes getloser muot .
0,1301 Sich sa wandelen bigan .
0,1302 michel wunder sei des nam .
0,1303 waz daz vbel waere .
0,1304 Die gaeistlichen sele .
0,1305 Gab si dar vmbe .
0,1306 daz si daz erfunde .
0,1307 Ein taeil si ez widersaz .
0,1308 ze dem wurme sprach si daz .
0,1309 “Der vns daz obez verbot .
0,1310 der sprach daz vns der tot .
0,1311 Da von chvmftic waere .”
0,1312 “daz la dir sein vmmaere .”
0,1313 Sprach aber do der slange .
0,1314 “daz rete er von danne .
0,1315 Als ich dir gesaget han .
0,1316 dv wirdest als got gitan .
0,1317 Swie schier dv sein gizzest .
0,1318 fvr war dv daz wizzest .
0,1319 Dir werdent elliv dinc chunt .”
0,1320 do geriet aber der vbel hunt .
0,1321 Daz si gie . da si den bovm sach .
0,1322 vnt des obzes dar abe brach .
0,1323 Als si ez in den munt ginam .
0,1324 zehant begraeiff sei div scham .
0,1325 Ein lovp si fvr sich brach
0,1326 wan ir vf gitan was
0,1327 Die svnde mit der schande .
0,1328 des si e . nicht erchande .
0,1329 Daz was ir do gewizzen .
0,1330 div arme was enbizzen .
0,1331 ze michelen riwen .
0,1332 der grozen vntriwen .
0,1333 Der het si engolten .
0,1334 daz si chomen wolten .

0,1335 vber ir schephaere .
0,1336 ein burde vil swaere .
0,1337 Hete si vf sich geladen .
0,1338 als wir si noch hivte tragen .
0,1339 zehant erzaegte sich der neit .
0,1340 harte vorcht ir daz weip .
0,1341 Daz si dem manne waere .
0,1342 immermer vmmaere .
0,1343 vnt erbunde im des .
0,1344 daz er dannoch was .
0,1345 Raeine vnt vnschaemlich .
0,1346 daz er ir wurde geliech
0,1347 Durch daz verriet si den man .
0,1348 als sei der tivel hete gitan .
0,1349 vnt trug im daz obez zuo .
0,1350 vil harte erchom er do .
0,1351 als si ez gegen im bot .
0,1352 wan er vorchte den tot .
0,1353 Der im da von gehaeizzen was .
0,1354 do v'riet in daz .
0,1355 Daz si ouch nicht en starp .
0,1356 wan ir daz selbe gehaeizzen wart .
0,1357 von div gevolget er ir bet .
0,1358 daz ouch er daz selbe tet .
0,1359 Daz si hete gitan .
0,1360 do waren si vngehorsam .
0,1361 worden bediv ensant .
0,1362 ein wnechlich giwant .
0,1363 Het in der tivel ab gezogen .
0,1364 er het siv bediv sampt betrogen .
0,1365 do si daz obez gazzen .
0,1366 do musen si lazzen .
0,1367 Die wat der vnschulde .
0,1368 si heten gotes hulde .
0,1369 Gaerlichen verlorn .
0,1370 vnt wol verdinet seinen zorn .
0,1371 Der vil stanche vf siv ergie .
0,1372 wand er s immer seit engelten lie .
0,1373 Ir affterchomen alle .
0,1374 von dem selbem valle .
0,1375 wie hoh er alle die hat bracht .
0,1376 die seit dar wider habent gidacht .
0,1377 Ein lvtzel vber mittentac .
0,1378 vnser herre dar trat .
0,1379 vz dem himelreiche .
0,1380 in daz paradeise .
0,1381 vnt suchte den man .
0,1382 An dem was gevallen san .

0,1383 Div sunne des rechtes .
0,1384 div schulde seines chnehtes .
0,1385 was im vil wol chunt .
0,1386 im erbarmte daz in d' vbel hunt .
0,1387 Svs hete betoeret .
0,1388 daz er het vberhoreet .
0,1389 Seines schephaeres gibot .
0,1390 dri stunt er chot .
0,1391 "wa bist u adam .
0,1392 macht u her zu mir gan ."
0,1393 als er ze dem dritem mal sprach .
0,1394 d' da vil schuldic was .
0,1395 wider seinen herren .
0,1396 er erschamte sich vil sere .
0,1397 Ein loup er fvr sich brach .
0,1398 daz eines oelboumes was .
0,1399 Da er engegen im gie .
0,1400 er sprach "herre ich bin hie .
0,1401 Do ich dein stimme v'nam .
0,1402 do begraef mich div scham ."
0,1403 Des antwurte der ware christ .
0,1404 "wa von waeist uo waz scham ist .
0,1405 Hast u daz obez gaz ."
0,1406 vil wol ez im giwizzen was .
0,1407 Doch vragt er sein vmbe daz .
0,1408 daz div seine gyte .
0,1409 gern vernomen hete .
0,1410 Ob er riwe wolde haben .
0,1411 der arme begunde sich entsagen .
0,1412 Den schilt er fvr sich bot .
0,1413 da mit chouft er vns den tot .
0,1414 vnt verlos vns gotes hulde .
0,1415 alle seine schulde .
0,1416 wolt er vf got haben gezogen .
0,1417 er sprach "mich hat daz wip betrogen .
0,1418 Die du mir herre gaebe ."
0,1419 recht als ob er spraeche .
0,1420 "Ich wil vil vnschuldic sein .
0,1421 daz du mir gaeb daz wip des sint die schulde dein ."
0,1422 Der genaedige got .
0,1423 ze dem wibe do chot .
0,1424 "wes riet du daz dem manne ."
0,1425 si sprach daz ir z div slange .
0,1426 Hete geraten .
0,1427 do sprach er also drate .
0,1428 "Der mvzze ze vnlusten .
0,1429 gen vf den brusten .
0,1430 Hinnefvr vf der erde .

0,1431 div vientschaft div werde .
0,1432 vnder weiben vnt vnd' slangen .
0,1433 vnt muz ouch vil lange .
0,1434 vnder in zwein gesten .
0,1435 swa einander widergen .
0,1436 Da rament die slangen .
0,1437 mit zagel vnt mit zungen .
0,1438 Dem weibe der versen .
0,1439 vnt ob der wurm werde .
0,1440 Gervret von dem wibe daz geloubet .
0,1441 mit der versen an daz houbet .
0,1442 Sa ce stet lige er tot ."
0,1443 noch ist ez als ez got gebot .
0,1444 E was der slange .
0,1445 daz ist vns gesaget lange .
0,1446 Ein vil herlich geschafft .
0,1447 vnt hete die chrafft .
0,1448 Daz er vfrechter gie .
0,1449 fvr daz er den vluoch enphie .
0,1450 Do lag er vff dem buoche .
0,1451 zesamne gelochen .
0,1452 do er sich an dem wurm gerach .
0,1453 zuo dem wibe er do sprach .
0,1454 "Ich gemanicvaltige deiniv laeit .
0,1455 d must laiden arbaeit .
0,1456 Hinnefvr immermere .
0,1457 deiniv chint gebirst dv mit sere .
0,1458 vnder dem gewalte deines mannes ."
0,1459 zu adame sprach affter des .
0,1460 "verfluchet sei div erde .
0,1461 in deinem werche ze vnwerde .
0,1462 Div mvz dir gebern .
0,1463 distel . vnt dorn .
0,1464 Hinnefvr dv mvzzest .
0,1465 swaz so dv nvtzest .
0,1466 Mit swaeizze gewinnen .
0,1467 ob dv deines weibes stimmen .
0,1468 Mer hast gehorsamet denne mir .
0,1469 nv setze ich die arbaeit dir .
0,1470 vntz dv ze einer erde .
0,1471 werdest vnwerde .
0,1472 Du bist ein erde vn- ein stovb .
0,1473 dar zu must v werden ouch ."
0,1474 O we . wie er sich rach .
0,1475 ze laeide er im do sprach .
0,1476 "Nu ist worden adam .
0,1477 als vnser einer gitan ."
0,1478 Do sprach er vmbe daz .

0,1479 daz er dar vmbe was .
0,1480 worden vngehorsam .
0,1481 daz er wurde gitan .
0,1482 als sein schephaere .
0,1483 wir versten daz div rede waere .
0,1484 Gesprochen in schimfweise .
0,1485 fvr daz paradeise .
0,1486 Er siv bediv samt stiez .
0,1487 einen engel er do hiez .
0,1488 Der was gehaeizzen cherubin .
0,1489 daz er sei dar wider in .
0,1490 Dehaenen weis icht liezze .
0,1491 er sprach ob er gaezze .
0,1492 Daz obez daz des lebens waere .
0,1493 daz er danne waere .
0,1494 Immermer vntoedlich .
0,1495 daz was div vil geliech .
0,1496 als ob in erbarmoete .
0,1497 ob der mensch in der noete .
0,1498 Immerme ligen solde .
0,1499 vnt daz er s nicht en wolte .
0,1500 Ez waer vns gewisse ein michel not .
0,1501 erlost vnser sele der tot .
0,1502 vz disem ellende nicht .
0,1503 wan in daz ewige liecht
0,1504 Gebirt er die rechten .
0,1505 swie harte wir in fvrchten .
0,1506 die tvr man biwarte .
0,1507 mit einem fivrinem swerte .
0,1508 vntz ez der schacher dan huop .
0,1509 des tages do got sein bluot .
0,1510 An dem chrivce vz goz .
0,1511 da er vns die porten mit entsloz .
0,1512 als si vns hvt offen stat .
0,1513 einer ieglichen sel div gern dar in gat .
0,1514 wir giengen alle gern dr in .
0,1515 da muz aber mer bei sien .
0,1516 Den ein also reichlich ganc .
0,1517 den stouf den er da hie transc .
0,1518 Der genaedige christ .
0,1519 ob vns daz erbe lieb ist .
0,1520 Des mvz wir alle bichorn .
0,1521 oder wir haben ez immer verlorn .
0,1522 Nv mag iv wol erbarmen .
0,1523 daz dem vil armen .
0,1524 Dem e . nictes gibrast .
0,1525 vnt dem div ginuchtsam was .
0,1526 Gegeben aller dinge .

0,1527 daz er mvse gewinnen .
0,1528 Mit dem seinem swaeizze .
0,1529 chovm vnt aglaeizze .
0,1530 Daz er . ernerte den lip .
0,1531 er erwante daz vil wol siet .
0,1532 Der tivel der in da bitrovc .
0,1533 daz er vil gar lovc .
0,1534 Er gehiez im vbel vnt guot .
0,1535 der het er vil vnt genuc .
0,1536 Beider erchvnnen .
0,1537 einen sun si gewonnen .
0,1538 Den hiezzen si cayn .
0,1539 er mvse in wol sien .
0,1540 In den ceiten vil lieb .
0,1541 doch er vbel geriet .
0,1542 Got lobten si vmbe den sun .
0,1543 schier gewonnen si einen d' zvo .
0,1544 Den hiezzen si abele
0,1545 do si got bede .
0,1546 Affter manigen tagen dannen .
0,1547 ir opher solden bringen .
0,1548 Abel was ein guot man .
0,1549 vz allem seinem vihe er nam .
0,1550 Daz allerbeste lamp .
0,1551 daz er inder dar vnder vant .
0,1552 Got er daz brachte .
0,1553 iener wirser gedachte .
0,1554 Der da elter was .
0,1555 seine garbe er vberdrasch .
0,1556 Do er sei got wolde bringen .
0,1557 dem wir da nicht verhelten megen .
0,1558 Ir baeider herce er an sach .
0,1559 dem einem er do zu sprach .
0,1560 So vns div schrifft chvndet .
0,1561 "cayn dv hast gesvndet .
0,1562 Des sol in gistillen .
0,1563 deines bruder willen .
0,1564 chvmt vil hoher vber dich .
0,1565 des opher enphah ich ."
0,1566 Daz was cayn laeit .
0,1567 daz got sein opher vermaeit .
0,1568 vnt ze dem abeles sach .
0,1569 vil starche er ez vber in rach .
0,1570 ze tode er in dar vmbe sluc .
0,1571 do gemaeilte daz bluot .
0,1572 Die magetraeinen erde .
0,1573 daz der gotes werde .
0,1574 vor seinem bruder vz goez .

0,1575 daz mort was michel vn- groz .
0,1576 do er do gefrvnte .
0,1577 die michelen svnte .
0,1578 vnt daz vil michel maeil .
0,1579 der ware got im erschaein .
0,1580 Dar nach vil schiere .
0,1581 vnt fraget in wa waere .
0,1582 Abel der bruder sein .
0,1583 des antwurte im cayn .
0,1584 Er n wesse wa er waere .
0,1585 ob er ein hvtaere .
0,1586 Seines bruder solde sein .
0,1587 “waz hast v gitan cayn .”
0,1588 Sprach der vil ginaedige christ .
0,1589 dem nicht verholen ist .
0,1590 “Div stimme deines bruder .
0,1591 rvffet vil lovte .
0,1592 Blutige her zu mir .
0,1593 waz het er gitan dir .
0,1594 Daz du in mortlich hast erslagen .
0,1595 div erde div da enphangen habe .
0,1596 Daz bluot abeles .
0,1597 div mvzze hinnenfvr des .
0,1598 Immermer verfluchet sein .”
0,1599 do sprach der arme cayn .
0,1600 “Meiner svnde ist so vil .
0,1601 daz ich en getar noch en wil
0,1602 Nimmer gesinnen .
0,1603 daz ich antlaz gewinne .
0,1604 So groz ist mein vnrecht .
0,1605 hivte wird ich armer chnecht .
0,1606 verworfen herre von dir .
0,1607 nv waeiz ich herre daz ez mir .
0,1608 An zweivel muz ergan .
0,1609 seit ich dein hulde verlorn han .
0,1610 Swa ich nv gen aeine .
0,1611 vf der wilden haeide .
0,1612 Da erslecht mich mein eigen chvnne .”
0,1613 do sprach div gotes stimme .
0,1614 “Daz waere mir nicht liep .
0,1615 doch widerrede ich ez nicht .
0,1616 Dir en werde vil we .
0,1617 vf der erde div in enphie .
0,1618 Deines bruder abeles bluot .
0,1619 vnt ist aber ienemen der ez tuot .
0,1620 Des laeit sibenvaltig ich .
0,1621 swer so erslehet dich .”
0,1622 Ane sache sol ez nicht sein .

0,1623 daz der arme cayn .
0,1624 verfluchet von got was .
0,1625 daz er doch disiv wort sprach .
0,1626 Swer so in erslvge .
0,1627 daz vber den mvse .
0,1628 So michel rache ergan .
0,1629 dar an mvg wir verstan .
0,1630 Daz er des nicht en wil .
0,1631 daz iemen den andern so vil .
0,1632 ze laeide gitan habe .
0,1633 daz er in durch daz erslahe .
0,1634 vil gerichtes wil er selbe phlegen .
0,1635 vnt daz wir einander vergeben .
0,1636 der arme schiet dannen .
0,1637 so wart er bivangen .
0,1638 Mit der missetriwe .
0,1639 daz er rechte riwe .
0,1640 Nimmer mer giwan .
0,1641 eine chonen er im ginam .
0,1642 ze meren daz geslaechte .
0,1643 etwer nv maechte .
0,1644 fragen wa waere dannoch daz weip .
0,1645 da was ez ein vil lange ceit .
0,1646 von cayns gebvrte .
0,1647 e . von im wrte .
0,1648 Sein bruder abel geboren .
0,1649 ez moechte werden geboren .
0,1650 vil manic mensch vnder div .
0,1651 wand adam driv .
0,1652 vnt sechzic chint gewan .
0,1653 der waren driv vnt dricic man .
0,1654 Daz ander waren allez wip .
0,1655 die gewan er e . vnt ouch seit .
0,1656 So div schrift in genvgen steten wil .
0,1657 der buoch ist ouch vil .
0,1658 Die der zal nicht en habent .
0,1659 als vns die buchstabe sagent .
0,1660 Daz hat nv dirre buchstab .
0,1661 daz adam vil manigen tac .
0,1662 Affter div waere .
0,1663 mit laeide . vnt mit sere .
0,1664 So harte bivangen .
0,1665 daz er von dannen .
0,1666 Alzogis seinen chonen maeit .
0,1667 so vmmaezlichen laeit .
0,1668 was im der Abeles toet .
0,1669 vntz im got verboet .
0,1670 Seinen svn er im wol galt .

0,1671 do er hundert iar alt .
0,1672 wart . do gewan er daz beste chint .
0,1673 daz er e . oder sint .
0,1674 Ie . gewinnen moechte .
0,1675 von des geslaechte .
0,1676 wart der gotessvn giborn .
0,1677 vnt versvente den zorn .
0,1678 Den got ze dem menschen ie giwan .
0,1679 er wart ein vil saeliger man .
0,1680 Den hiezzen si sethin .
0,1681 vil michel vrvde si hetin .
0,1682 Affter des lebt adam .
0,1683 vnt er in gewan .
0,1684 Acht hundert iar .
0,1685 daz sage ich iv fvr war .
0,1686 Einen sun er do gewan .
0,1687 sam der verworchte man .
0,1688 Den hiez er enos .
0,1689 ein stat er im chos .
0,1690 Durch des chindes liebe .
0,1691 do scimbert er schiere .
0,1692 Ein burch lussam .
0,1693 die hiez er alsam den svn .
0,1694 Des waene wir allerbeste .
0,1695 daz waere div erste veste .
0,1696 Div vf der erde ie gelac .
0,1697 dar nach lebt er manigen tac .
0,1698 Cayn der verworchte man .
0,1699 vntz er einen svn gewan .
0,1700 Der hiez girat .
0,1701 so ez der buchstabe hat .
0,1702 von des chindes chinde .
0,1703 wart daz vnбилde .
0,1704 An cayn errochen .
0,1705 von dem wart er erschozen .
0,1706 Der hiez lamech .
0,1707 got im die gabe verlech .
0,1708 Daz er mit dem bogen wol schoz .
0,1709 vntz er vor alter verlos .
0,1710 vil harte sein liecht .
0,1711 er tet ez seines danches niht .
0,1712 Daz er cayn erschoz .
0,1713 fvr ein tyer er in chos .
0,1714 Da er in einem boeschen saz .
0,1715 Als im von got ertaeilet was .
0,1716 wie mochte daz sien .
0,1717 daz der arme cayn .
0,1718 Seinem sun ein burch worchte .

0,1719 do er im so harte vorchte .
0,1720 fvr daz er den fluoch enphie .
0,1721 daz er immermere gie .
0,1722 In dem stovdaehe .
0,1723 daz in iemen saehe .
0,1724 von dem er wurde erslagen .
0,1725 si mochten wol holz haben .
0,1726 vnt waren die livte so starch .
0,1727 daz man schiere michel werch .
0,1728 Der mit fvr cherte .
0,1729 als in etwer lerte .
0,1730 So moecht ez wol frvmen sein wip .
0,1731 nv chvrce wir ez enceit .
0,1732 wir mvgen ez allez nicht gesagen .
0,1733 genuc mvz wir sein vertragen .
0,1734 Die do wurden giborn .
0,1735 vil sere si den goteszorn .
0,1736 taeglichen choufften .
0,1737 vntz er mvse bisivfften .
0,1738 In der sinfluote .
0,1739 mit manig' vngvte .
0,1740 Triben si in der zuo .
0,1741 daz in mvs riwen dv .
0,1742 Daz er den menschen ie geschuoff .
0,1743 ein rechter man do wuchs .
0,1744 In setes geslaechte .
0,1745 der wart durnaehte .
0,1746 Mit allen seinen siten guot .
0,1747 sein sich ouch ane hup .
0,1748 wol in manigen enden hie .
0,1749 wan got mit im manige wunder bigie .
0,1750 ER was gehaeizzen Noe .
0,1751 do daz wazzer vil we .
0,1752 Tet allem dem daz der was .
0,1753 vil wol er genas .
0,1754 Seiner gvte er nicht engalt .
0,1755 do er wart fvmf hundert iar alt .
0,1756 Der got liebe man .
0,1757 drei svn er gewan .
0,1758 Der hiez einer Cham .
0,1759 der ander hiez Sem .
0,1760 Der drite hiez Iaphet .
0,1761 von in allen drin stet .
0,1762 Michel wunder geschriben .
0,1763 wie siv got wolde gefriden .
0,1764 Mit vaeterlicher gvte .
0,1765 in der sinflute .
0,1766 Nv welle wir iv mer sagen .

0,1767 als vil so wir mvgen .
0,1768 wie si chovfften den goteszorn .
0,1769 daz er lie werden verlorn .
0,1770 Alle die der waren .
0,1771 wan die da ginaren .
0,1772 In der Noes arche .
0,1773 er rach sich vil starche .
0,1774 Do si ez brachten der zuo .
0,1775 zwaei geslaechte waren duo .
0,1776 Daz aeine hiez div goteschint .
0,1777 si liezzzen in svmliche sint .
0,1778 Des vil vbel geniezzzen .
0,1779 die andern die hiezzzen .
0,1780 Der menschen chint .
0,1781 harte mischten si sich sint .
0,1782 Mit ir hiraete .
0,1783 daz eine chom von Sethe .
0,1784 Daz ander chom von cham .
0,1785 den goteschinden an gewan .
0,1786 Div wip wol getanen .
0,1787 si machten daz si namen .
0,1788 Chonen in daz verworchte chvnne .
0,1789 div chint div si da bei gewonnen .
0,1790 Die verwurffen gotes gibot .
0,1791 ir schephaeres lop .
0,1792 Hazten si vil sere .
0,1793 die vluhen goetlich ere .
0,1794 vil maniges si sich vnderzugen .
0,1795 da si sich selbe mit betrugten .
0,1796 vnt ouch got vermanden .
0,1797 in allen den landen .
0,1798 wart daz vnrecht so groz .
0,1799 daz si got von recht verlos .
0,1800 wand er vil manic maeil sach .
0,1801 durch not er do sprach .
0,1802 Daz sein gaeist maechte .
0,1803 in der menschen geslaechte .
0,1804 Gewonen nicht mere .
0,1805 in gerov vil sere .
0,1806 Daz er siv hete gischaffen .
0,1807 des waere so vil erwachsen .
0,1808 Des nicht wesen solde .
0,1809 daz er vertilgen wolde .
0,1810 Allez daz do waere .
0,1811 daz nictesnicht ginaere .
0,1812 div wort sprach er Noe zuo .
0,1813 vnt hiez in dv .
0,1814 vnt hiezzze in wrchen ein arche .

0,1815 michel . vnt starche .
0,1816 Div ringes holzes waere .
0,1817 da er selbe inne genaere .
0,1818 Er gab im die mazze .
0,1819 daz er sei solde lazzen .
0,1820 Fvmf hundert chlaffter lanc .
0,1821 an der hindern want .
0,1822 Hiez er lazzen die tvr dar in .
0,1823 er sprach daz si solde sein .
0,1824 Fvmfzic chlaffter tieff .
0,1825 dreizecher er hiez .
0,1826 Sei lazzen vollechleiche .
0,1827 stiege . vnt venster reiche .
0,1828 vnt chemnate .
0,1829 hiez er im drate .
0,1830 wrchen genvge .
0,1831 er schuff daz er gifvge .
0,1832 wol verworchtiv venster .
0,1833 si bestriche mit chlenster .
0,1834 Hiez er lazzen oben in .
0,1835 er sprach “der vierst sol sein .
0,1836 Einer chlafftern braeit .”
0,1837 nicht langer er do baeit .
0,1838 zwaeinzic iar dacht er d’ zuo .
0,1839 vollechlichen er sei dvo .
0,1840 zehenzic iar worchte .
0,1841 wan er daz wazzer vorchte .
0,1842 vnt do ez wesen solde .
0,1843 daz got erzaeigen wolde .
0,1844 Seinen zorn vil starche .
0,1845 do hiezze er in die arche .
0,1846 Noeen so vil tragen .
0,1847 daz er dar inne moechte haben .
0,1848 wol ze einem iare speise .
0,1849 im gebot ouch got der wise .
0,1850 Daz er dar in solde nemen .
0,1851 seine svn . vnt ir chonen .
0,1852 Er hiez in dar in gewinnen .
0,1853 aller lebentiger dinge .
0,1854 Ie . sibeniv vnt sibeniv .
0,1855 vnt sprach daz div elliv .
0,1856 Rein solten sein .
0,1857 er hiez des vnraeinen drin .
0,1858 Ie . zwei . vnt zwei setzen .
0,1859 nv liset man vns an ein’ letzen .
0,1860 Daz div rede geschaehe .
0,1861 vor dem sintwaege . Siben tage vor vnt nicht mer .
0,1863 ze michelem wunder .

0,1864 Myzze wir iv ez sagen nvo .
0,1865 wie er div tyer elliv dvo .
0,1866 So gahes gevienge .
0,1867 want siv dannoch gienge .
0,1868 vf der wilden haeide .
0,1869 in vil weiter spraeide .
0,1870 nv habent genvge den streit .
0,1871 daz er lenger ceit .
0,1872 Dar zuo mvse haben .
0,1873 daz welle wir iv wider sagen .
0,1874 wir svlen noch en megen .
0,1875 daz nicht wider reden .
0,1876 In en hulfe vil wol daz .
0,1877 daz er sein waeidegeselle was .
0,1878 Der si ouch solt erneren .
0,1879 dem moechten si sich nicht erwerben .
0,1880 Er entribe si im elliv ce hant .
0,1881 da er siv vor der arche vant .
0,1882 Do er do ieglichem stat .
0,1883 in der arche gegab .
0,1884 Got selbe zvo sloz .
0,1885 do wart ein weter vil groz .
0,1886 Si taten die vrspringe vf .
0,1887 elliv wazzer giengen voz .
0,1888 Der himel vinster gewan .
0,1889 stanche ez regen bigan .
0,1890 vierzic tage volle .
0,1891 daz die berge alle .
0,1892 Stunden in dem wage .
0,1893 so tieffe z ware .
0,1894 Der der hoehiste was .
0,1895 daz des nicht gibrast .
0,1896 Ez engienge dar vbere .
0,1897 da ist nicht widere .
0,1898 Fvmfzehen chlaffter tieff .
0,1899 daz in got da gehiez .
0,1900 Daz mvos in alle volchomen .
0,1901 wir haben des nicht vernomen .
0,1902 Daz icht des genaere .
0,1903 des vf der erde waere .
0,1904 wan daz got dar inne bisloz .
0,1905 vil weiten div arche vloz .
0,1906 In der sinflute .
0,1907 sei truc div gotesgvte .
0,1908 do daz wazzer seigen bigan .
0,1909 div mensch wunder genam .
0,1910 Die da genaren .
0,1911 vnt in der arche waren .

0,1912 Noe do sande .
0,1913 wie ez stvende in dem lande .
0,1914 vz ze boten einen raben .
0,1915 daz im der wider solte sagen .
0,1916 wie ez stvende in dem reiche .
0,1917 do tet er boesleiche .
0,1918 Daz er nicht wider cham .
0,1919 eine touben er do nam .
0,1920 vnt sande ouch vz die .
0,1921 div was ein guot vogel ie .
0,1922 Div chom des selben tages widere .
0,1923 mit mvedem gevidere .
0,1924 Ich en waeiz waz sei genaere .
0,1925 oder wa si gevlogen waere .
0,1926 Si moechte sich nicht gesetzen .
0,1927 si ne wolde sich netzen .
0,1928 Er nthielt sich aber danne .
0,1929 siben tage lange .
0,1930 vntz sich der wac baz zeliez .
0,1931 die selben touben er do hiez .
0,1932 vz varen aber sa .
0,1933 do vlouch si vnz ich en waeiz wa .
0,1934 Si einen oelbovm sach .
0,1935 ein zwei si dar ab brach .
0,1936 Daz brachte si im do .
0,1937 des wurden si vil vro .
0,1938 An dem zwei er wol sach .
0,1939 daz gesigen was der wach .
0,1940 Da si z da hete gebrochen .
0,1941 dennoch baetet er ein wochen .
0,1942 vntz ez baz geviele .
0,1943 wa div toube entwiele .
0,1944 Oder durch waz si daz liez .
0,1945 do er sei ze der driten stunde hiez .
0,1946 vz varen nach mere .
0,1947 si widersagt im nicht mere .
0,1948 Ich en waene si sein vergaz .
0,1949 do si so chaltiv gesaz .
0,1950 An die warmen sunnen .
0,1951 rechte wir en chvnnen .
0,1952 Iv dar vmbe nicht gesagen .
0,1953 wan . do in den selben tagen .
0,1954 Nicht hin wider quam .
0,1955 michel wunder in des nam .
0,1956 Do brach er obene daz dach .
0,1957 selbe er do wol sach .
0,1958 wie ez stvende in dem lande .
0,1959 daz er got erchande .

0,1960 Des het er vil wol ginozzen .
0,1961 div arche was entslozzen .
0,1962 Do gie vz vnt chras .
0,1963 allez daz dar inne was .
0,1964 An die svzzen waeide .
0,1965 trucchen was div haeide .
0,1966 Do daz wazzer v'vloz .
0,1967 vnt got die arche entsloz .
0,1968 Do schuf der haeilige christ .
0,1969 dem speise . vnt vnt wist .
0,1970 Den da seine gyte .
0,1971 vntz her ernerte hete .
0,1972 Er hiez im bowen die erde .
0,1973 daz im dar vff wurde .
0,1974 Genuchtsam alles guotes .
0,1975 vnt hiez im des bluotes .
0,1976 Mit dem vlaische nicht ezzen .
0,1977 daz er solde wizzen .
0,1978 Daz des vihes sele .
0,1979 in dem bluote waere .
0,1980 vnt alle die ez ezzen wolten .
0,1981 die mvsen in die sel gelten .
0,1982 do het dem herren Noe .
0,1983 daz wazzer gitan so we .
0,1984 Daz er nicht wolte bowen .
0,1985 er mocht des nicht gitrowen .
0,1986 Daz ez mit fride waere .
0,1987 vor dem sintgewaege .
0,1988 Div werlt immermere .
0,1989 do gehiez im vnser herre .
0,1990 vnt muos ez halt vil vaste loben
0,1991 do sant er im den regenbogen .
0,1992 Ze einem vrchvnde .
0,1993 daz er mit wages vnde .
0,1994 Die werlt nimmer mer v'lur .
0,1995 als dicche als er daz zaeichen chur .
0,1996 Daz er dar an gedaechte .
0,1997 daz er im gehaeizzen haete .
0,1998 Daz er vns mit der sintfluot .
0,1999 nimmer mer laeit getuot .
0,2000 Owe der haeilige christ .
0,2001 wie vollechlich er doch gut ist .
0,2002 Daz er so vlegte seinen schalch .
0,2003 wie vlaeizchlich er im bivalch .
0,2004 Daz er worchte ein altare .
0,2005 vnt im dar vff gaebe .
0,2006 Alles seines gutes taeil .
0,2007 do huop sich erste daz haeil .

0,2008 Daz man chirchen buwen bigan .
0,2009 Noe . was gehorsam .
0,2010 Als verre so er chunde .
0,2011 bowen er begunde .
0,2012 Er phlanzte weingarten .
0,2013 do die ze nutz wurden .
0,2014 Durch den seltsaemen smac .
0,2015 so man si wol cihen mac .
0,2016 vnt in div schrift in genvgen steten wil .
0,2017 do tranc er eines tages so vil .
0,2018 Daz ez im den rechten sin binam .
0,2019 vnt daz den guoten man .
0,2020 Der slaf so vaste begraeif .
0,2021 daz sein wat von im entslaeif .
0,2022 Daz er schaemlichen lac .
0,2023 sein sun cham daz ersach .
0,2024 Er wolt in niht wecchen .
0,2025 er wolt ouch in nicht decchen .
0,2026 Er wolt ez ouch nicht verdagen .
0,2027 sunder er wolde sagen .
0,2028 Seines vater schande .
0,2029 seinen bruder er bisande .
0,2030 Daz si daz mvsen sehen .
0,2031 wie ir vater waere geschehen .
0,2032 Daz tet er im ce laeide .
0,2033 si dachten in baeide .
0,2034 vil getrivlichen .
0,2035 vnt als im begunde weichen .
0,2036 Div trunchenhaeit vngimach .
0,2037 do wesse er wol dar nach .
0,2038 wie si heten gitan .
0,2039 er sprach “mein sun cham .
0,2040 Der mvzze seiner brvder eigen sein .
0,2041 die da bedachten die schame mein .”
0,2042 von den wurden die schalche giborn .
0,2043 wan si heten wol gearnet seine- zorn .
0,2044 nv welle wir iv einz d’ vnd’ sagen .
0,2045 daz wir iv da vor biwaeret haben
0,2046 Mit manigen vrchvnden
0,2047 da wil ich ze disen stunden
0,2048 Svmlichez her wir reden .
0,2049 wir en svlen noch en megen .
0,2050 Des nicht gelouben .
0,2051 daz mit vlaischlichen ougen .
0,2052 Ie dehaein man saehe got .
0,2053 weder do er div wort wider Noe chot .
0,2054 Oder inder an dehaeiner stet .
0,2055 die rede die er mit adam tet .

0,2056 In dem paradeise .
0,2057 vnt mit cayn dem vnweisen .
0,2058 vnt mit abelen .
0,2059 daz was nicht mere .
0,2060 wan daz ein engel im erschaein .
0,2061 nie gesach ir dehaein .
0,2062 Elyas vnt Enoch .
0,2063 die er dar zuo zoech .
0,2064 Daz er siv noch bede .
0,2065 mit leibe vnt mit sele .
0,2066 Hat bihalten swa er wil .
0,2067 die en gesahen in nie als vil .
0,2068 Do oder siet .
0,2069 abraham vnt dauit .
0,2070 Die gesahen in nie .
0,2071 solt in iemen sehen hie .
0,2072 Daz het moyses gitan .
0,2073 von dem ich wol vernomen han .
0,2074 Daz er in vlæizchlichen bat .
0,2075 do er im die e . gap .
0,2076 Daz er sich in sehen lieze .
0,2077 nu sprichet daz buch er hiezze .
0,2078 Hin hinder einen staein sten .
0,2079 da er gahes fvr wolde gen .
0,2080 Daz er nach im saehe .
0,2081 daz buoch sprichet daz im got veriaehē .
0,2082 In en moechte niemen gesehen .
0,2083 im en mvse da von laeit geschehen .
0,2084 daz tet der herre Moyses .
0,2085 seine varwe verloes er des .
0,2086 vnt wart so rechte liechte .
0,2087 von der selben gesichte .
0,2088 Daz von im gie ein schien .
0,2089 sam zwæi horn fivrien .
0,2090 Obe im da von geschach .
0,2091 daz er nie nicht en sach .
0,2092 wan einen blic durch einen staein .
0,2093 nv werdet rechte des enein .
0,2094 waz dem waere geschehen .
0,2095 der gaenzlichen hete gesehen .
0,2096 Alle seine magenchrafft .
0,2097 waerlich die en gisach .
0,2098 Sant peter noch nie .
0,2099 weder dort noch hie .
0,2100 Er n getuot . noch nie gitet .
0,2101 e . als manchvne erstet .
0,2102 Si sehent in denne michel baz .
0,2103 denne die engel geloubet daz .

0,2104 Die in da immer svlen loben .
0,2105 als in die vbel habent erzogen .
0,2106 also sehent si in da .
0,2107 nv moechte etwer sprechen wa .
0,2108 So do ie waeren .
0,2109 daz si sein nicht saehen .
0,2110 Seine trovte alle .
0,2111 der daz ervinden welle .
0,2112 Der vorsche nach der stet .
0,2113 da von sant paulus ein rede tet .
0,2114 Der grozze leraere .
0,2115 daz er ez selbe waere .
0,2116 Des zoech er sich nicht an .
0,2117 er sprach er wesse einen man .
0,2118 Der dar gefvret waere .
0,2119 da er horte vnt saehe .
0,2120 So gitane wnne .
0,2121 von der menschen zunge .
0,2122 Nicht moechte gesagen .
0,2123 da mvgen si sich wol zuo haben .
0,2124 Die dar nach vragent hie .
0,2125 daz aber er des ie .
0,2126 Iemen veriaeh .
0,2127 daz er got selben saehe .
0,2128 Des habe wir nicht vernomen .
0,2129 die dar sint chomen .
0,2130 Die sint vil wol bihalten da .
0,2131 vnt ouch anderswa .
0,2132 In dem gotesreiche .
0,2133 da er selbe taegliche .
0,2134 Ist ir fvr . vnt ir frivde .
0,2135 in seiner bischivde .
0,2136 Da mennent si sich inne .
0,2137 so si iene her nach svlen gewi-nen .
0,2138 So habent si sein noch nicht gesehen .
0,2139 swer icht anders dar vmbe wil iehen .
0,2140 Des antwurt wir im enceit .
0,2141 so wir vernemen seinen streit .
0,2142 ER hat ein tieffe rede gitan .
0,2143 ze div daz er vns benne den man .
0,2144 Der da tichtet daz liet .
0,2145 er n taete sein fvrnamens nicht .
0,2146 Er n wesse wol die warhaeit .
0,2147 der elliv rechtiv buoch da schraeip .
0,2148 Mit dem wil er z behaben .
0,2149 vnt wil dar vber sagen .
0,2150 Manic testimonium .
0,2151 daz der ware gotessun .

0,2152 von dem selben dinge sprach .
0,2153 do er mensch hie en erde was .
0,2154 Daz vns michel hilfe giet .
0,2155 in genvgen stet in bat siet .
0,2156 Gregorius der von geredet .
0,2157 da bi ir wol meget .
0,2158 Die warhaeit erchennen .
0,2159 daz er denne .
0,2160 vil wol vindet .
0,2161 ob sich iemen vnderwindet .
0,2162 Dehaeines streites dr umbe .
0,2163 iedoch wil ich nuo ze stunde .
0,2164 Iv des ein taeil sagen .
0,2165 wie daz chvmt daz si nicht en megen .
0,2166 Gesehen den haeiligen christ .
0,2167 die doch sint da er da ist .
0,2168 Da tze himel ist niemen gar .
0,2169 e . ouch der lip chvmet dar .
0,2170 Der dannoch hie en erde ist .
0,2171 als den vnser herre christ .
0,2172 wider git der sele .
0,2173 so sehent si in immermere .
0,2174 ze gesichte ze gesichte .
0,2175 vnt sehent in algerichte .
0,2176 Als er vns nv tuot .
0,2177 dennoch habent si seiniv guot .
0,2178 Nicht ce voller beschivde .
0,2179 wan sich meret ir vrvide .
0,2180 von tagen . ze tagen .
0,2181 so horee wir daz buoch sagen .
0,2182 Der nv gerne hvb einen streit .
0,2183 der spraeche “so sahen si in immer seit .
0,2184 Die mit im erstunden von dem grabe .
0,2185 An dem saeligem tage .
0,2186 Do der gotessun erstvont .”
0,2187 naein en z war noch en tvont .
0,2188 wan saehen in die wol .
0,2189 so waeiz ich z wiv daz buoch sol .
0,2190 Da man vns abe hat gelernt .
0,2191 daz die engel taeglichen gernt .
0,2192 Die sehen ir schephaere .
0,2193 waerlichen vnt waere .
0,2194 Der iemen da mit volchomen .
0,2195 so waer div gierde gar binomen .
0,2196 Sante Mychahele .
0,2197 wan er ist vil here .
0,2198 Im ist got vil lieb .
0,2199 in sehent die engel . vn- sehent sein nicht .

0,2200 Owi wie chvmt daz .
0,2201 der ie in einem gadem was .
0,2202 Der en gesach ez vzen nie .
0,2203 also habt iv vmbe die .
0,2204 Die in got sint .
0,2205 er giwan nie so liebez chint .
0,2206 Daz im so liep waere .
0,2207 daz ez ie gesaehe .
0,2208 Alle seine magenchrafft .
0,2209 wan er ist vnendhafft .
0,2210 Elliv dinc er . ervllet .
0,2211 vntz er vns vmbehullet .
0,2212 Er ist ir gruntveste . vn- ir dach .
0,2213 als sant Iohannes sprach .
0,2214 Der haeilige ewangeliste .
0,2215 der vz der gotesbrvste .
0,2216 vil michelen weistum nam .
0,2217 daz mvget ir ane wan .
0,2218 vil wol gelouben .
0,2219 wan vmbe die gotes tougen .
0,2220 vnt von seiner gothaeit .
0,2221 me niemen tieffer gesaeit .
0,2222 Der wil des vaste iehen .
0,2223 daz er noch sei vngesehen .
0,2224 vnt gelouben ez ouch wol da bi\e .
0,2225 daz vnser dehaeiner sei
0,2226 Der des mit mir mvge geiehen .
0,2227 daz er den andern habe gesehen .
0,2228 Seh wir den andern an dem vlaische .
0,2229 wir sehen niemen An dem gaeiste .
0,2230 disiv rede ist tieff vnt swaere .
0,2231 niemen en waere .
0,2232 Der mit seinen sinnen .
0,2233 moechte fvr bringen .
0,2234 An die goteslere .
0,2235 noch redete wir gern mere .
0,2236 von dem Anegenge .
0,2237 wa- ih fvrchte ez duncche iv ze lenge
0,2238 Als ez ouch wol maechte .
0,2239 wan sehs vnt dricic gislaechte .
0,2240 von adamen chomen waren .
0,2241 vnz an die ceit z ware .
0,2242 Daz got mensch wart .
0,2243 Mvsen si allesamt varen .
0,2244 si waeren reich oder armen .
0,2245 Si mvsen ze helle .
0,2246 swen div pechwelle .
0,2247 Da nicht vollichlichen twanc .

0,2248 der muse rovch vnt stanc .
0,2249 vnt dar zuo die vinsten tragen .
0,2250 daz wir iv da wellen sagen .
0,2251 Da horeet vlaeizechlichen zuo .
0,2252 wie der ware got duo .
0,2253 Vns dem tivel an gewunne .
0,2254 eine samnvnge .
0,2255 Div gotes erbarmde gisprach .
0,2256 wan si vil vngerne sach .
0,2257 vnser ewigez laeit .
0,2258 da widerfur div warhaeit .
0,2259 Der erbarmde vnt der gute drate .
0,2260 nu sazzen si ze rate .
0,2261 vm den menschen der da was v'lorn .
0,2262 vf hoeher stunt der goteszorn .
0,2263 vntz vns genade geschach .
0,2264 div erbarmde do alreste sprach .
0,2265 "Heya gewal . vnt weistum .
0,2266 wenne moecht wir daz widertvon .
0,2267 vm den menschen der da v'lorn ist .
0,2268 nv gedenche daz dv ez got bist .
0,2269 Gewin in wider etwie .
0,2270 der dem tivel hat gedienet ie .
0,2271 Daz er ewichlich icht verlorn sei .
0,2272 den wir haben geschaffen frei .
0,2273 wan er hat michel laeit ."
0,2274 des antwurt im div warhaeit .
0,2275 Si sprach "mich duncchet an gedinge .
0,2276 solde er gewinnen .
0,2277 von helle die widervart .
0,2278 dem von vns gehaeizzen wart .
0,2279 vil waerlichen der tot .
0,2280 do man im daz obez verboet .
0,2281 vnseriv wort mvzzen war sein .
0,2282 vnt solt doch die hantgitat dein .
0,2283 Nicht lazzen vnderwegen .
0,2284 wer sint die gislaffen megen .
0,2285 vnt nimmer erwachent .
0,2286 einen mensch mvz wir machen .
0,2287 Reinen vz der erden .
0,2288 der etwenne werde .
0,2289 vm den menschen gegeben ."
0,2290 do sprach div warhaeit "wir en mege- .
0,2291 Des tages do adam .
0,2292 wart vnghehorsam .
0,2293 Do wart verfluchet div erde .
0,2294 in seinem werche ze vnwerde .
0,2295 Daz mac nicht werden widertan .

0,2296 elliv dinc ich leichter han .
0,2297 vz nichte gischaffen .
0,2298 danne daz ich wider mache .
0,2299 Den menschen als er e was .”
0,2300 “nv weist u vil wol daz .”
0,2301 Sprach aber div erbarmde .
0,2302 “ob durch adames gernde .
0,2303 verfluchet waer div erde .
0,2304 in seinem werche ze vnwerde .
0,2305 Daz in vnserm werche niht v’fluchet ist .
0,2306 dv da gewaltic got bist .
0,2307 wil dv im geben die widervart .
0,2308 wan er der zu betwungen wart .
0,2309 So macht u von der erden .
0,2310 einen menschen haeizzen w’den .
0,2311 Dannen ene wirt geraeinet .”
0,2312 da mit wart div maget gemaeinet .
0,2313 Div vns daz haeil brachte .
0,2314 owe . wie tieff er dachte .
0,2315 Der genaedige got .
0,2316 div warhaeit ze der barmde chot .
0,2317 “Nv weist u vil wol daz .
0,2318 daz nicht en was .
0,2319 Daz den tivel an vaechte .
0,2320 wan sein eingen Andachte .
0,2321 von himel viel er ane not .
0,2322 in den ewigen tot .
0,2323 Durch daz er fri geschaffen was .
0,2324 nv bedenche wir daz .
0,2325 wie von der broeden erden .
0,2326 ein so vester mensch solte werden .
0,2327 von dem gitragen wurde .
0,2328 aller menschen burde .
0,2329 Mit chreffte an zaghaeit .
0,2330 swenne ir div micheln laeit .
0,2331 von dem tivel hiete .
0,2332 vnt von seiner diete .
0,2333 Daz er nicht geswiche der burde .
0,2334 ob er so geschaffen wurde .
0,2335 Daz er gevallen nine moechte .
0,2336 so waer daz fri geslaechte .
0,2337 Da mit nicht vergolten .
0,2338 ez n waere daz wir wolten .
0,2339 Dem tivel vnrechte tuon .”
0,2340 “da ne chom ez nimmer zuo .”
0,2341 Sprach daz haeilige rechte .
0,2342 “welle wir im nemen seine chnechte .
0,2343 Daz sol mit rechte werden gitan .”

0,2344 "weiser got woldest v ez an ergan ."
0,2345 Sprach aber div baermde .
0,2346 "daz div menschlich aermde .
0,2347 An dich naemest .
0,2348 vnt daz dv quaemest .
0,2349 In einer reinen magde buoch
0,2350 so wurde wol geholffen vf .
0,2351 Allem manchvne .
0,2352 ob dv Ane sunne .
0,2353 Von der dv geboren wurdest .
0,2354 vnt durch den menschen ersturbest .
0,2355 So wurden alle die gehaeilet .
0,2356 die sich selben nicht vertaelent ."
0,2357 "Owe" sprach der giwalt .
0,2358 "waz hab wir An vns gizalt .
0,2359 wie sol vns ertaeilet werden .
0,2360 des himels . vnt ouch der erden .
0,2361 vnt elliv dinc muz biwaren .
0,2362 mvg wir den stouf nicht vervaren ."
0,2363 Sprach div haeilige weishaeit .
0,2364 "durch des menschen saelichaeit .
0,2365 werd ez nach deinem willen volbraht ."
0,2366 als daz recht vernam die andaht .
0,2367 Do sprach ez dar vnder .
0,2368 vn- sprach "wir wellen wrchen wund' .
0,2369 Nv svl wir behvten daz recht .
0,2370 ob wir dem tivel seinen chnecht .
0,2371 Mvgen an gewinnen .
0,2372 daz tuon mit so gitanen dingen .
0,2373 Daz er her nach icht mege .
0,2374 mit dehaeiner slacht rede .
0,2375 Gesprechen vf seinen schalch .
0,2376 der sich im selben bevalch .
0,2377 Daz ist vnser ere .
0,2378 vnt ist iedoeh gefvre .
0,2379 Des schuldigen chnechtes .
0,2380 daz recht deines rechtes .
0,2381 Ist ein gerte deines reiche ."
0,2382 e . div stunt vil vroemdechleiche .
0,2383 Der fride hin dane .
0,2384 als er die rede v'name .
0,2385 Do spranch er der zuo .
0,2386 einander chusten si duo .
0,2387 Daz haeilige recht vnt der fride .
0,2388 do het div barmvnge vertriben .
0,2389 Alle die vientschaft .
0,2390 div zwischen dem menschen vn- got was bihaft .
0,2391 ze sune was chomen der chnecht .

0,2392 daz sach von himel daz recht .
0,2393 vil dicche her an die erden .
0,2394 daz der mensch gehaeilet solde w'den .
0,2395 Do der tieffe rat fvr wart .
0,2396 do chvnte got seine vart .
0,2397 Von himel her en erden .
0,2398 daz er mensch wolde werden .
0,2399 vf sich nam er die svnde .
0,2400 die allez manchvne .
0,2401 An gierbet waren .
0,2402 von hern adames iaren .
0,2403 daz tet er chunt den weissagen .
0,2404 Er hiez siv ez nicht verdagen .
0,2405 er hiez siv chvnden vberal .
0,2406 daz er den adames val .
0,2407 wolde bringen ze gvote .
0,2408 mit sein selbes blvote .
0,2409 Daz taten si ze ware .
0,2410 Vil vnhelbaere .
0,2411 wie er mensch wolde werden .
0,2412 vnt wie er wolde ersterben .
0,2413 Daz sagten si verre vor .
0,2414 flucht von dem ewigem verlor .
0,2415 Si vlaeizchlichen rieten .
0,2416 gedinge si hieten .
0,2417 ze div daz im chvmftic was .
0,2418 daz der himel nicht durchbrast .
0,2419 Daz was vil dicche ir chlage .
0,2420 daz in ce helfe dar abe .
0,2421 Ir vrloesaere .
0,2422 dester schierer chomen waere .
0,2423 do got den willen wolde .
0,2424 ervullen als er solde .
0,2425 Den sein guottaete .
0,2426 ze dem haeile haete .
0,2427 Daz vns da solde geschehen .
0,2428 ein maget hiez er vor bisehen .
0,2429 Chivsche . Vnt raeine
0,2430 ledic aller maeile .
0,2431 vnt vil diemvte .
0,2432 michel waren ir gvte .
0,2433 ze der wart ein engel gesant .
0,2434 ze galylea in daz lant .
0,2435 Hin ze einer stet .
0,2436 div ist gehaeizzen nazaret .
0,2437 Dar inne gesprach sei der got .
0,2438 er gehiez ir heil von got .
0,2439 Mit disen Worten gruzt er sei da .

0,2440 "haeilic wis dv frowe Maria .
0,2441 volliv genaden dv bist .
0,2442 vnser herre mit dir ist .
0,2443 Vber elliv wip solt v gesegen sein .
0,2444 vnt daz wucher des bovches dein .
0,2445 Dv solt bern ein chint .
0,2446 des div reich elliv sint ."
0,2447 Der vnchunden warte .
0,2448 erchom si vil harte .
0,2449 Si sprach "von wie gitanen dingen .
0,2450 sol ich chint gewinnen .
0,2451 wan ich nie erchande man .
0,2452 Vnt ouch des dehaeinen wan .
0,2453 Daz ich immer man erchenne ."
0,2454 do sprach er an der stunde .
0,2455 "Du traeist den waren gotessun .
0,2456 von dem haeiligem gaeiste enphaehest v n .
0,2457 Daz chint sol haeizzen iesus ."
0,2458 des antwurt im div maget sus .
0,2459 "Er ist mein herre vn- ich sein div .
0,2460 doch bin ich vil vnwirdigiv .
0,2461 Des daz dv mir vil armer sagest .
0,2462 nv gescheh ez als dv gesprochen habest ."
0,2463 div maget was gevestent eine- ma- .
0,2464 do si do gahes bigan .
0,2465 von dem chinde grozzen .
0,2466 do wolde er sei lazzen .
0,2467 Tovgenlichen sprach der ewangeliste
0,2468 do was aber er von christe .
0,2469 Dar zuo wirdiger bidacht .
0,2470 daz mit im werde volbracht .
0,2471 Daz er da vor hete bisehen .
0,2472 Ane sache solt ez nicht geschehen .
0,2473 Daz der gotessvn waere .
0,2474 im ze einer muoter naeme .
0,2475 Eine maget div bevestent was .
0,2476 er tet ez dar vmbe daz si dester baz .
0,2477 Dem tivel moechte verheltn seine vart .
0,2478 vnt daz ouch si da mit vb' wart .
0,2479 Des div alte e gebot .
0,2480 einem ieglichem weibe was d' tot .
0,2481 Ertaeilet div wurt erfunden .
0,2482 mit so gitanen svnden .
0,2483 Da von moechten chomen chint .
0,2484 ane chonlichiv dinc .
0,2485 Die solt man alle staeinen .
0,2486 von so gitanen maeinen .
0,2487 Moechten si sich vbels haben entsaget .

0,2488 hat si des gemahels nicht gihabet .
0,2489 Er tet ez ouch vmb ein ander dinc .
0,2490 so si gebaere daz chint .
0,2491 Daz er ez vaeterlichen zuge .
0,2492 vnt in Egiptum mit im fluhe .
0,2493 vz des chvniges aechte .
0,2494 vnt mit ir daz ophaer braechte .
0,2495 Durch so gitane maere .
0,2496 wolt vnser haeilaere .
0,2497 Eine gimahel ze einer muot' neme-
0,2498 div im doch wol moechte gizemen .
0,2499 vnt div doch waere ein maget .
0,2500 e daz der engel daz sagte .
0,2501 Ioseben dem gvten man .
0,2502 do wolt er sei lazzen han .
0,2503 vntz im der engel ab' erschaein .
0,2504 er sprach "dv solt des ab' werde- enaein .
0,2505 Daz dv nemest deine chonen .
0,2506 du ne darfst dar ab nicht erchomen .
0,2507 Si sol ein chint gewinnen .
0,2508 daz hat si enphangen .
0,2509 von dem haeiligem gaeiste .
0,2510 mein gebot dv dar an laeiste .
0,2511 Daz ez iesus werde genant .
0,2512 daz chivt in divtscher zunge haeila-t .
0,2513 Er sol seine diet enbinden .
0,2514 von allen ir svnden ." .
0,2515 der vil saelige man .
0,2516 die frowen er ze sich ginam .
0,2517 vnt phlag ir mit huote .
0,2518 vnz div maget guote .
0,2519 Des chindes solte genesen .
0,2520 do het si aermchlichez wesen .
0,2521 So wir da bei chiesen megen .
0,2522 daz man den mvose legen .
0,2523 Der elliv dinc muz biwaren .
0,2524 in einer chvo baren .
0,2525 Do sein div here maget ginas .
0,2526 owi wie wunderlich doch was .
0,2527 Elliv sein andacht .
0,2528 daz er in der sweine bacht .
0,2529 Sein houbet ie geleite .
0,2530 wer aber im daz seite .
0,2531 Daz si in nine frazzen .
0,2532 daz welle wir iv wizzen lazzen .
0,2533 Mit chvrzlichen Worten .
0,2534 an dem velde den vihierten .
0,2535 Bracht ein engel div maere .

0,2536 daz ein haeilant waere .
0,2537 Geborn ze bethlehem .
0,2538 er hiez siv drate dar gen .
0,2539 Da si in da funden .
0,2540 mit hadern bewunden .
0,2541 In einer vihechrippen .
0,2542 aermlichen likken .
0,2543 Als er daz maere sagte .
0,2544 hin vmbe daz ez vol tagte .
0,2545 Do wart der engel ein michel taeil .
0,2546 die vns daz ewige haeil .
0,2547 Chunten des tages vil gewis .
0,2548 si sungem "gloria in excelsis ." .
0,2549 Ane sache daz nicht ergie .
0,2550 daz er z die vihierte wizzen lie .
0,2551 In saeite z ein redlicher bote .
0,2552 si waren der ivden die von gote .
0,2553 Ein michel taeil heten v'nomen .
0,2554 vnt was durch siv her chomen .
0,2555 vnt giborn von ir gislaechte .
0,2556 swie er siv gieren maechte .
0,2557 Daz het er gern gitan .
0,2558 daz mvget ir dar an verstan .
0,2559 Daz den armen vihierten .
0,2560 so grozze maer wurten .
0,2561 von den engelen gesaget .
0,2562 vnt daz ir wol vernomen habet .
0,2563 Daz den drin herren .
0,2564 die da chvnige waren .
0,2565 In chvniges gislaechte .
0,2566 in vil chlaeiner achte .
0,2567 Mit einem vil vnredlichem dinge .
0,2568 daz nicht hete stimme .
0,2569 vnt was ouch vnverstenlich .
0,2570 dem vihe lebten si geliech .
0,2571 vnt en wessen waz got was .
0,2572 von div was recht daz .
0,2573 Do si nicht sinnes haben wolden .
0,2574 daz in daz chint zaeigen solde .
0,2575 Ein vnredhafter bote .
0,2576 Alsus bidacht ez allez got .
0,2577 Uvaz daz zaeichen waere .
0,2578 daz die chvnige maere .
0,2579 Hin tze dem hovse laeitte .
0,2580 vnt in daz chint zaeigte .
0,2581 Daz hat vns geschriben da .
0,2582 Matheus ewangelista .
0,2583 An seinen haeiligen buchstaben .

0,2584 er sprichet in den tagen .
0,2585 Do giborn wart daz chint .
0,2586 des div reich elliv sint .
0,2587 Do schaein ein liechter sterne .
0,2588 in dem ostern reiche verre .
0,2589 Drin chvnigen maeren .
0,2590 do si vz gegangen waren .
0,2591 Schowen an daz gestirne .
0,2592 in der liste lirne .
0,2593 Heten si sich geflizzen .
0,2594 daz si mochten wizzen .
0,2595 allez daz in chvmftic was .
0,2596 ir muot gehiez in daz .
0,2597 Daz ein chvnic waere giborn .
0,2598 der waer vber al die werlt erchorn .
0,2599 ze herren immer solde sein .
0,2600 si giengen drate dar wider in .
0,2601 vnt namen drier slachte gebe .
0,2602 si folgiten nach dem wege .
0,2603 Den si da weiste der sterne .
0,2604 vz dem osterm reiche verre .
0,2605 Begunde er in allez vor gen .
0,2606 vntz in die burch ze ierusalem .
0,2607 Da hal er sich ze einer vrist .
0,2608 als vns da von geschriben ist .
0,2609 Daz si s nicht en sahen .
0,2610 do begunden si vragen .
0,2611 Wa daz chint waere .
0,2612 der chvnic ist vber israhele .
0,2613 Der da waere giborn .
0,2614 den heten si dar zuo erchorn .
0,2615 Daz si in an beten gerne .
0,2616 vnt in erschin ein sterne .
0,2617 Der si dar hete bracht .
0,2618 ein vil vbel andacht .
0,2619 Het der chvnic herodes .
0,2620 er wande sicherlichen des .
0,2621 Daz im iemen vor waere .
0,2622 er vnt alle die burgaere .
0,2623 wurden dirre warte .
0,2624 bitrvbet vil harte .
0,2625 Do si ez vernamen .
0,2626 vil harte si erchamen .
0,2627 ze sundersprach er do nam .
0,2628 die dri dar chomen man .
0,2629 Er vragte siv der maere .
0,2630 wie in der stern erschinen waere .
0,2631 Daz taten si im ce wizzen .

0,2632 alle die sich geflizzzen .
0,2633 Heten in den buochen .
0,2634 die hiez er im suochen .
0,2635 Die weisisten in dem gesinde .
0,2636 er vragte von dem chinde .
0,2637 von den die propheten .
0,2638 geweissaget heten .
0,2639 wa des geburt solde ergen .
0,2640 si sprachen “ze betlehem .”
0,2641 vnt sagten im daz .
0,2642 daz der burge zu was .
0,2643 Gesprochen von dem weissagen .
0,2644 daz wir alle nine mvgen .
0,2645 Mit Worten vervahen .
0,2646 do si im do veriahen .
0,2647 Daz si von dem chinde heten gilarn .
0,2648 vnt do die herren wolden varn .
0,2649 Do bat siv der chvnic herodes .
0,2650 vil vlæizchlichen des .
0,2651 So si daz chint funden .
0,2652 daz si im z solten chvnden .
0,2653 Er solt ouch digen an .
0,2654 daz was mit vngitriwen .
0,2655 Als er wol erzæigte seit .
0,2656 vnt als vns daz buch sæit .
0,2657 Swaz er wunders da .
0,2658 vnt ouch seit anderswa .
0,2659 In drin vnt drizec iaren begie .
0,2660 do er was mensch hie .
0,2661 vnt in sechs vnt zwæinzec wochen .
0,2662 daz ist uns allen offen .
0,2663 wie aermchlich er hie was .
0,2664 vntz er erfulte allez daz .
0,2665 Daz die propheten .
0,2666 von im geweissaget heten .
0,2667 Dem rechte gieng er wol nach .
0,2668 vntz er seiniv verlorniv schaff .
0,2669 wol wider haeim brachte .
0,2670 gegen einer ieglichen svnde er gidahte
0,2671 Einer ebengeleicher buzze .
0,2672 die bittere gegen der svzze .
0,2673 Die er leiden solde .
0,2674 wan do der tivel even vellen wolde .
0,2675 Do gehiez er in bæiden .
0,2676 mit vngetriwen æiden .
0,2677 Als si des obzes enbizzen .
0,2678 daz si fvr war solden wizzen .
0,2679 Bediv daz wip vnt der man .

0,2680 daz si wurden als got gitan .
0,2681 Im ebenreich vnt ebenher .
0,2682 vnt do si do mer .
0,2683 Selbe gewinnen wolten .
0,2684 denne si haben solten .
0,2685 Da von wurden si versalt .
0,2686 in des tivels gewalt .
0,2687 vnt in daz ewige laeit .
0,2688 do si gevielen mit der geitichaeit .
0,2689 vnt mit der vbermvte .
0,2690 vnt mit vppiger gyte .
0,2691 vnt wurden vngehorsam .
0,2692 vnt heten manslacht gitan .
0,2693 vnt ein sacrilegium .
0,2694 wie moechten s immer wir s getuon .
0,2695 Si wurden ouch maeineide
0,2696 daz wart in billichen ze leide .
0,2697 wan si heten den verlorn .
0,2698 der siv het erwelt vnt erchorn .
0,2699 den engelen in der hoehe .
0,2700 vnt der menschlichen broede .
0,2701 zu im selbem het vereinet .
0,2702 daz ist also gemeinet .
0,2703 Do got geschuff vnser vlaisch .
0,2704 do nam er sein selbes gaeist .
0,2705 vnt blies den dar in .
0,2706 daz wir seiniv solden sien .
0,2707 vnt er vnser houbet .
0,2708 des heten si sich beroubet .
0,2709 Durch des tivels rat .
0,2710 daz was ein michel meintat .
0,2711 do si gotes hulde .
0,2712 von ir selber schulde .
0,2713 verluren so manigen wies .
0,2714 da bi svlt ir sein gewis .
0,2715 Swer von des tivels schulde .
0,2716 ein houpthafte svnde .
0,2717 Getuot oder hat gitan .
0,2718 er muz ir aller schuldic stan .
0,2719 Die vns da verboten sint .
0,2720 vnt alle die fvr einen wint .
0,2721 Div gotes gebot wellent haben .
0,2722 si getunt vil leichte schaden .
0,2723 also ergieng ez even vnt adamen .
0,2724 do si die warhaeit wolde- habe- ze eine- wane .
0,2725 vnt fvr einen hinternlist .
0,2726 die in der haeilige christ .
0,2727 Durch allez guot zu sprach .

0,2728 do ez do adam zebrach .
0,2729 Do was verirret ir geloube .
0,2730 vnt waren gevallen an dem rovbe .
0,2731 vnt wurden vngehorsam .
0,2732 vnt ein sacrilegium gitan .
0,2733 Vnt heten vns allesamt erslagen .
0,2734 daz mvge wir fvr michel not sagen .
0,2735 Si waren ledic vnchivscher dinge .
0,2736 elliv ir minne .
0,2737 was ein wnne ir gaeistes .
0,2738 ane girde ir vlaisches .
0,2739 Got het si im ze trovte genomen .
0,2740 daz von in raeiner wuocher waer chome- .
0,2741 Die minne si getrvbten .
0,2742 d' raeinen fridel si vberhygten .
0,2743 Die waren minne si fluhen .
0,2744 zuo dem tivel si sich zugen .
0,2745 ze troute si den namen .
0,2746 der mit seinem samen .
0,2747 Erchvchte boesez minnen .
0,2748 ir vlaisch mvse brinnen .
0,2749 wand do begunde ez gern .
0,2750 des si z vil dicche mvsen wern .
0,2751 Daz was ein michel vberhuor .
0,2752 mit dem willen adam des swuor .
0,2753 Do im got daz obez verbot .
0,2754 vnt im da von gehiez den tot .
0,2755 Daz er z immer meiden wolde .
0,2756 als er von rechte solde .
0,2757 Do wart er maeineide .
0,2758 daz got ich vnderscheide .
0,2759 vnser zunge . oder den munt .
0,2760 des ist vndurft im was vnchunt .
0,2761 Elliv vnser andacht .
0,2762 e . daz herce habe fvr bracht .
0,2763 Gedanch oder willen .
0,2764 vberlovt . oder stille .
0,2765 So ist ez im allez chunt .
0,2766 sein ist vndurft daz im d' munt .
0,2767 Immer icht bescheide .
0,2768 ez sint allez eide .
0,2769 Swaz im daz herce gelobet .
0,2770 owe wie harte er tobet .
0,2771 Der daz immer widerraeit .
0,2772 ez n sei ein meiner aeit .
0,2773 Swaz wir im gehaeizzen .
0,2774 ob wir des nicht laeisten .
0,2775 Si heten ouch daz maeiste sacrilegiu- gitan .

0,2776 daz ie dehaein man .
0,2777 vf der erde getet .
0,2778 daz si an einer so haeiligen stet .
0,2779 Ie . missetaten .
0,2780 vnt daz nicht bidachten .
0,2781 Daz ez was in dem paradeise .
0,2782 von div ist er vnweise .
0,2783 Der da sprichet daz adam .
0,2784 nicht vil hete gitan .
0,2785 wider die goteshulde .
0,2786 wan er sei verlos mit voller schulde .
0,2787 wie groz div schulde waere .
0,2788 doch erbarmte vnserm schephaere .
0,2789 vnser ewigez laeit .
0,2790 doch en wolde er die warhaeit .
0,2791 Noch daz recht nicht schenden .
0,2792 er wolt ez anders wenden .
0,2793 Er wolte ouch dem tivel nicht giwalt tuon .
0,2794 sein erbarmde vnt sein weistuom .
0,2795 Die gedachten einer wage .
0,2796 sam ob dar vf laege .
0,2797 Elliv div schulde .
0,2798 da mit si verluren gotes hulde .
0,2799 Dar zu chom daz recht gesezzen .
0,2800 ez begunde vlaeizchlichen mezzen .
0,2801 Do div schulde wart vf gitragen .
0,2802 vnt man die wage enbore solde haben .
0,2803 So was daz vnrecht so swaere .
0,2804 ob allez guot der gegen gelaeit waere .
0,2805 Daz ie iemen getet .
0,2806 so en waer div wage von der stet .
0,2807 Nimmer erwegen .
0,2808 vnze sich got dar vf mvse legen .
0,2809 Do gidacht div gotes weishaeit .
0,2810 wie sich vnser laeit .
0,2811 von erste hete erhaben .
0,2812 dem wol er ein geleichez tragen .
0,2813 Ze dem ersten vf die wage .
0,2814 swer vns nv vrage .
0,2815 wie sich hube der val .
0,2816 den birichte wir sein wal .
0,2817 daz chom von einem weibe .
0,2818 div wart mit neide .
0,2819 von dem tivel bstanden .
0,2820 wie si sich geschanden .
0,2821 Des wurden si ze rate .
0,2822 swer si also drate .
0,2823 Mochte geschvnden .

0,2824 ze den obristen svnden .
0,2825 Div da haeizzet vbermuot .
0,2826 ez en wart nie nicht so vnguot .
0,2827 Ez wart ouch got nie nicht so laeit
0,2828 des heten si die warhaeit .
0,2829 An in selben enstanden .
0,2830 einen boesen gaeist si sanden .
0,2831 In daz paradeise .
0,2832 der chom geslichen leise .
0,2833 zu der getlosen .
0,2834 er tet ir ein rat boesen .
0,2835 Den nam si fvr guot .
0,2836 durch ir vbermuot .
0,2837 vnt durch ir geitichaeit .
0,2838 gab si genade vmbe laeit .
0,2839 Da wider wart von got .
0,2840 ein vil redlicher bot .
0,2841 Ze einer magde gesant .
0,2842 an d' . man dehaein boeshaeit vant .
0,2843 Vnt div nie getlos wart .
0,2844 noch dehaein hohvart .
0,2845 In ir herce nie gewan .
0,2846 vnt die nie nichtes gezam .
0,2847 wan daz ir got gegeben hete .
0,2848 vnt nie begie dehaein vppige gyte .
0,2849 Ir chivsche . vnt ir raeine .
0,2850 div wagen wider div maeine .
0,2851 Die der tivel an truc .
0,2852 da mit er allez manchvne ersluoc .
0,2853 Da wider wolt got wider geben .
0,2854 vns daz ewige leben .
0,2855 Do was ouch daz billich .
0,2856 daz dirre rat haeimlich .
0,2857 vor dem tivel waer verholn .
0,2858 als ouch er verstoln .
0,2859 zu der armen even slaeich .
0,2860 vntz er vns alle beswaeich .
0,2861 Der vbel engel der louc .
0,2862 vntz er daz arm wip betrouc .
0,2863 Er gruzte sei ouch da mite .
0,2864 daz er ir einen fluch tete .
0,2865 wan ditz sein erste rede was .
0,2866 “we . z wiv lat ir daz .
0,2867 Daz ir alles des obzes nicht ezzet .
0,2868 daz ir hie inne wizzet .”
0,2869 Also ist ez an dem sinne .
0,2870 versweige wir z we vnser stimme .
0,2871 So sprach er z doch mit dem muote .

0,2872 er hiet sei als leicht geschvndet ze gute .
0,2873 wan daz er daz gern sach .
0,2874 daz ir vil we geschach .
0,2875 Er gehiez ouch ir vil waerliech .
0,2876 si wurden got geliech
0,2877 ob si daz obez aezze .
0,2878 daz si z ze nicht widersaezze .
0,2879 Der disiv wort verstet nah d' schrift .
0,2880 so was ez ein fluoch vnt ein v'gift .
0,2881 da wider wart d' magde ein segen .
0,2882 von dem engel gegeben .
0,2883 Den got zw ir dar sante .
0,2884 swaz er ir ouch chunte .
0,2885 Daz selbe daz ergie .
0,2886 als er die rede ane vie .
0,2887 Er gehiez ir ouch div dinc .
0,2888 div einem wiebe sorchlich sint .
0,2889 wan ez nimmer en wirt .
0,2890 swa ein wip chint gebirt .
0,2891 Si chom sein in angest vnt in not .
0,2892 wider dem gute daz der tivel bot .
0,2893 Da wider wolt got sein haeil geben .
0,2894 wider den fluoch . den segen .
0,2895 wider die luge die warhaeit .
0,2896 der man gehiez die reichaet .
0,2897 Div enphie den ewigen tot .
0,2898 d' man ab' gehiez die chvmftigen not .
0,2899 Div enphie daz ewige leben .
0,2900 div mvo was ir ouch gegeben .
0,2901 Halt mit michelem vollen .
0,2902 do div maget vnbewollen .
0,2903 von dem chinde begunde grozzen .
0,2904 do macht div natover nicht v'lazzen .
0,2905 Ir n wurde etwenne we .
0,2906 daz het got wol geordent e .
0,2907 wie der ir raeine lip .
0,2908 fvr daz schuldige wip .
0,2909 Im solte helfen bvzzen .
0,2910 eva giwan nie so grozze svzze .
0,2911 Mit dem gedingen fvr sich .
0,2912 daz si got wurde geleich .
0,2913 In engulte Maria .
0,2914 mit riwen vollechlichen da .
0,2915 Do si sach daz man ir sun vie .
0,2916 vnt do si zu dem chrivce gie .
0,2917 Do buzte si alle die trite .
0,2918 die du arme zu dem holze tete .
0,2919 Man sagt vns ze ware .

0,2920 daz ez daz holz waere
0,2921 Da der mensch an geviele .
0,2922 alle die liebe .
0,2923 Die eua dar zuo giwan .
0,2924 daz si vnt ir man .
0,2925 Solden werden so here .
0,2926 die galt Maria mit sere .
0,2927 Do man den an sluc .
0,2928 den si in ir bouche truc .
0,2929 Div maget galt mit darben .
0,2930 daz ezzen da div vncharge .
0,2931 Da az ir schaden .
0,2932 si muse sich durch not enthaben .
0,2933 Do si ir sun lieben .
0,2934 sach hahen zuo den dieben .
0,2935 Do si in an daz chrivce . nageln sach .
0,2936 vnt do man in durch die seiten stach .
0,2937 Do was ir hercen vil we .
0,2938 nu sei niemen der ez so verste .
0,2939 Daz div maget raeine .
0,2940 icht buzte altersaeine .
0,2941 fvr daz schuldige wip .
0,2942 nein so het der tivel liecht .
0,2943 Gezogen in sein recht .
0,2944 daz im sein div vnt sein chnecht .
0,2945 Nicht waren vergolten .
0,2946 als si von rechte solten .
0,2947 Die er an dem roube gevie .
0,2948 dar vmbe sich got ouch martern lie .
0,2949 do div gotesgyte .
0,2950 mit vil manigem rate .
0,2951 Den gewalt des vbergie .
0,2952 daz er seinen zorn lie .
0,2953 vnt daz er nemen wolte .
0,2954 ob im der mensch gulte .
0,2955 vnt daz er im ze rechte wolde gistan .
0,2956 daz er wider in hete gitan .
0,2957 Do en hete menschlich gislaechte .
0,2958 niht so vil raeines daz ez v'gelten maechte .
0,2959 So michel was ir armde .
0,2960 do sprach ab' div erbarmde .
0,2961 ze dem habendem gewalte .
0,2962 einen menschen der mit im selben galte .
0,2963 Den sande er vns ce troste .
0,2964 der mit sein selbes leibe erlost .
0,2965 Allez manchvne .
0,2966 vmbe ein ieglich svnde .
0,2967 wolde er buzze leiden .

0,2968 vnt im selben nicht entleiden .
0,2969 Daz der herre adam .
0,2970 dar an hete missetan .
0,2971 Daz er hoher chomen wolte .
0,2972 denne er von recht solte .
0,2973 Da laeit dirre mensch widere .
0,2974 daz er sich selben so nidere .
0,2975 von hohen dingen brachte .
0,2976 daz er in dem bachte .
0,2977 vor den rindern lac .
0,2978 owe . wie er die wage wac .
0,2979 vnt wie er dem rechte nach gie .
0,2980 den tivel er sich bechorn lie .
0,2981 Rechte dri stunde .
0,2982 mit der selben svnde .
0,2983 Da adam an geviel .
0,2984 in des tivals giel .
0,2985 Mit vasten er ouch buzte .
0,2986 vierzic tage in der wste .
0,2987 Daz eve mit Adam .
0,2988 heten ein sacrilegium gitan .
0,2989 vnt ein vberhuor .
0,2990 vnt daz er itweders maeines swur .
0,2991 vnt lerte vns da mite .
0,2992 daz wir fvren mit guotem site .
0,2993 vz den vnmuzzen .
0,2994 so wir wolten bvozen .
0,2995 vn- so wir icht gutes biginnen wolten .
0,2996 wie wir vns da vor tempern solten .
0,2997 In der selben wste .
0,2998 bechort in der tivel allererste .
0,2999 Mit der chelgitichaeit .
0,3000 do er so lange maeit .
0,3001 Daz er nicht az noch en tranc .
0,3002 des het der tivel manigen gidanc .
0,3003 wie daz chomen maechte .
0,3004 daz er sam sein ander gislacchte .
0,3005 Nicht aezze noch en trunche .
0,3006 daz begunde in seltsaeme dunchen .
0,3007 vnt wolde sich der von nemen .
0,3008 der gidanch was nie so schiere chome- .
0,3009 So sich der gotessun hungern lie .
0,3010 ze div daz er in vndervie .
0,3011 vnt tet ouch dem sathanat .
0,3012 des versuchens stat .
0,3013 Also der valant .
0,3014 An im ervant .
0,3015 Daz in hungerot .

0,3016 er sprach “nv mach den staein ze brot .
0,3017 Ob du ez seist der gotessun .
0,3018 so macht du z harte wol tuon .
0,3019 vnt satte dich der mite .
0,3020 nach gewoenlichem site .
0,3021 Ob dir der hunger so leit .”
0,3022 zu der chelgiticheit .
0,3023 Het er in gerne gitriben .
0,3024 “nuo waeist u wol daz ist geschriben .
0,3025 Daz der mensch nicht einginote .
0,3026 mac gileben von dem brote .
0,3027 Er n habe daz goteswort der zuo .”
0,3028 mit hunger buzt er do .
0,3029 Der arm chelgitichaeit .
0,3030 ze vertilgen vnseriv laeit .
0,3031 do da der valant .
0,3032 dehaein stat an im vant .
0,3033 Do furt er in ze ierusalem .
0,3034 vnt bat in algerichte sten .
0,3035 vof daz tempel obene .
0,3036 vn- hiez in den livten ze lobene .
0,3037 Daz er hin abe viele .
0,3038 er sprach “dir choment schiere .
0,3039 Die engel vnt habent dich enbor .
0,3040 si sint dir allenthalben vor .
0,3041 vnt daz si dich fvren .
0,3042 und dein fvzze den staein icht rvren .”
0,3043 Des antwurte im der haeilant .
0,3044 “var furder valant .
0,3045 Ia ist ouch geschriben daz .
0,3046 daz dv vnraeinez vaz .
0,3047 Deinen herren nicht solt bechorn .
0,3048 dv hast dein arbaeit verlorn .”
0,3049 Da mit galt er diemvte .
0,3050 die vppigen gvte .
0,3051 Die eua . vnt adam .
0,3052 dar an heten gitan .
0,3053 Daz si gelobt wolden werden .
0,3054 von den livten vf der erden .
0,3055 vmbe ir gvte . vnt vm ir zaeichen .
0,3056 do er in dv nicht mochte erwaeichen .
0,3057 zuo der vppigen gvte .
0,3058 duo wolt er n bichorn mit d’ vb’mvte .
0,3059 Do furt er in vf ein hoehe .
0,3060 vnt sprach swaz er vbersaehe .
0,3061 Daz er in des giwaltic taete .
0,3062 ob er in nide’ vallende baete .
0,3063 Do hiez er n furder schaben .

0,3064 er sprach daz daz geschriben .
0,3065 Offenlichen waere .
0,3066 daz er seinen schephaere .
0,3067 Billichen ane baete .
0,3068 da buzt er die missetaete .
0,3069 Die eua . vnt adam .
0,3070 dar an heten missetan .
0,3071 Daz si wolten gotes reichtuom .
0,3072 dar nach liez er im tuon .
0,3073 als einem divbe .
0,3074 der givangen wirt an roube .
0,3075 Also liez er sich villen .
0,3076 durch vnsern willen .
0,3077 vnt lie sich vaste gihten .
0,3078 vnt vber sein ougen richten .
0,3079 als man vber die adames solte .
0,3080 die dar laeiten da . der tivel wolte .
0,3081 wand er vns verbinten lie .
0,3082 vnder den galgen strovchende gie .
0,3083 Er wart bespotet vnt bispirn .
0,3084 mit chrademe bischrirn .
0,3085 als man immer den tuot .
0,3086 der dem Anderm stilt sein guot .
0,3087 vnt der mit wirt gevangen .
0,3088 den bismant alle die d' zu chome-t gegangen .
0,3089 also liez er vnder dieve lonen .
0,3090 er lie sich mit dornen chroenen .
0,3091 Daz taten die iuden durch ir haz .
0,3092 da mit galt er wol daz .
0,3093 Daz eua vnt Adam .
0,3094 die seine goteschrone wolten han .
0,3095 vnt chvnicreiche .
0,3096 da galt er vollechleiche .
0,3097 In douchte billich vnt recht .
0,3098 ob der schuldige chnecht .
0,3099 von dem holze nam den tot .
0,3100 daz vns ouch hulfe von der not .
0,3101 Dar vmbe er an daz chrivce gie .
0,3102 die hende er ouch durchstechen lie .
0,3103 Die daz obez da namen .
0,3104 daz solt man adamen .
0,3105 vnt frovn even gitan .
0,3106 nu stuont aber dirre guot man .
0,3107 fvr siv an ir baeider stete .
0,3108 alle ir vnnvtze trite .
0,3109 Die richt man vb' sein fvze .
0,3110 er tranc ouch fvr die svze .
0,3111 Div vz dem obez da gie .

0,3112 daz ir baeider munt enphie .
0,3113 Die gallen vnt den ezzich .
0,3114 sein h'ce enphieng ouch einen stich .
0,3115 vmbe die boesen andacht .
0,3116 div siv bede ane vacht .
0,3117 Daz div vom ergistem gie .
0,3118 vmbe daz mort er sich hahen lie .
0,3119 Daz eua . vnt adam .
0,3120 an vns allen hete gitan .
0,3121 Dar vmbe liez er sich bigraben .
0,3122 als er am dritem tage .
0,3123 vns vor ersten wolte .
0,3124 daz wir sam ersten solten .
0,3125 ER wolt ouch daz wrte .
0,3126 mit d' selben verte .
0,3127 Div menschaet geeret .
0,3128 vnt ouch daz geleret .
0,3129 wie wir ze der haeimvte solten chom- .
0,3130 div vns da wart binomen .
0,3131 Da wart der tivel mit betrogen .
0,3132 daz im vz der hant war gezogen .
0,3133 Mit rechte allez manchvne .
0,3134 wand er adam vant ane svnde .
0,3135 vnz er im zuo gelouc .
0,3136 daz er in zuo den svnden bitrouc .
0,3137 Do zoech er in ze sich sa .
0,3138 daz recht verloes er gar da .
0,3139 Da er sich des vnderwant .
0,3140 an dem er seines nicht en vant .
0,3141 vnt in an alle schulde hie .
0,3142 da mit verloes er alle die .
0,3143 Die er mit recht hete bihabt .
0,3144 daz ist iv dicche vor gesagt .
0,3145 Swer dem anderm daz seine nimt .
0,3146 ob er im denne nach chvmt .
0,3147 Der nimt im wol daz selbe guot .
0,3148 vnt swaz er im anders getuot .
0,3149 Daz ist vnwandelwaere .
0,3150 vor dem tichtaere .
0,3151 also ergie ez dem valande .
0,3152 sich selben er gischande .
0,3153 Do er nicht an sehen wolde .
0,3154 seine grozze vnschulde .
0,3155 Der nie dehaein svnte .
0,3156 gitet noch gefrvnte .
0,3157 Do daz der tivel geriet .
0,3158 daz man als einen diep .
0,3159 Den geweihten gotessun erhie .

0,3160 do fur er hin ze helle vnt hiez die .
0,3161 Daz si sich vf taete .
0,3162 froelichen vnt drate .
0,3163 Si solte den enphahen .
0,3164 vnt er saehe in hahen .
0,3165 Der sich da hiez den gotessun .
0,3166 si solt ez froelichen tun .
0,3167 vnt er het ez giraten .
0,3168 mit den die ez da taten .
0,3169 vnt si solt in nimmer choelen .
0,3170 des antwurte im div helle .
0,3171 “Ez waene anders geschiht .
0,3172 z war ich sich ein michel liecht .
0,3173 Scheinen vor der helle .
0,3174 ich waene ez her welle .
0,3175 An zweivel du bist bitrogen .
0,3176 ich horee die ir schephare loben
0,3177 Die wir da heten in gitan .
0,3178 euen vnt adam .
0,3179 vnt alle die weissagen .
0,3180 die iehent daz si den vernomen haben .
0,3181 Der in ie daz gehiezze .
0,3182 daz er s vnderwegen icht liezze .”
0,3183 Do chom der vater . vnt d’ sun .
0,3184 do si vns genade wolden tun .
0,3185 vnt der haeilige gaeist .
0,3186 dem armen ze vollaeist .
0,3187 Die da waren in dem ewigem verlor .
0,3188 vnt zestiezzzen daz tor .
0,3189 DAz ez allez zebrast .
0,3190 dar inne erschaein ein vnchund’ glast .
0,3191 Den er da hete giladen .
0,3192 der chom im nach seinem schaden .
0,3193 Den hellegrauen er gibant .
0,3194 swaz er der rechten dar inne vant .
0,3195 Die furt er froeleiche .
0,3196 mit samt im in sein reiche .
0,3197 Dar nach am dritem tage .
0,3198 do erstuonde er von dem grabe .
0,3199 Nu vragent genvge der maere .
0,3200 wa er vnder div waere .
0,3201 vntz an den driten tac .
0,3202 ich en chan noch en mac .
0,3203 Iv der von nicht gecellen .
0,3204 svmliche die wellent .
0,3205 Daz der schachaere .
0,3206 der erste nach got waere .
0,3207 Der vf tet daz paradeise .

0,3208 do ez got der weise .
0,3209 von der helle gewan .
0,3210 ouch widerreit ez manic man .
0,3211 do der geweichte gotessun .
0,3212 den roup dem an gewan .
0,3213 Den er waenen wolte .
0,3214 daz er n immer haben solte .
0,3215 vnt do chom hin widere .
0,3216 von dirre nidere .
0,3217 In seines vater reiche .
0,3218 da gebarten vroemdechleiche .
0,3219 Die engel alle wider in .
0,3220 vn- trachten alle wer er mochte sien .
0,3221 vnt sprachen swer er waere .
0,3222 nv stunt sein wat sam eine- torculaere
0,3223 Des antwurt im mit diemvte .
0,3224 daz er die torculen eine hete .
0,3225 vnt im hulfe niemen der zvo .
0,3226 fvr daz die engel dvo .
0,3227 Recht An im erchanten .
0,3228 vnt an seinem bluotvarwem gewante .
0,3229 Daz den stul die menschaet .
0,3230 hete gewonnen mit arbaeit .
0,3231 Den si des tages bisaz .
0,3232 do gunden si vns deste baz .
0,3233 fvr die weile immer mere .
0,3234 der iv gemachet hab so here .
0,3235 Mit sein selbes bluote .
0,3236 dem lonet sein mit guote .
0,3237 Oder ich sag iv z ware .
0,3238 daz iv bezzet waere .
0,3239 Daz der selben verte .
0,3240 nie gedacht wurte .
0,3241 Nu lobe wir den gotessun .
0,3242 in secula seculorum .
0,3243 Amen .